

1 KORIYN

Pol Minj Nind Ak Koriyn Biynimb Kuyip Tikak Minim Nind Niņep

Pol nind am dawin yomb Koriyn mindiy, kuyip minim angñek gunap Jiysis nup chingyak. Kisen biynimb Krays ker kun gok gunap mindrep ma giyak minim ak niņiy, minj biy kuyip tikyokak.

Minim Ar Keykey Mindip Rek:

Minim nind anggak ak mindip chapta 1:1-9.

Krays biynimb nuk gok asik keykey ayning giyak minim ak mindip, chapta 1:10-4:21.

Biyn siy bi siy minim ak sek, biyn bi dep akan ma dep minim ak sek mindip, chapta 5:1-7:40.

Biynimb yikop gok gipay miñ ar ak ginjun akan ma ginjun angiy angniņey, Pol kuyip minim gunap anggak minim ak mindip, chapta 8:1-11:1.

Biynimb Krays ker Gor Kawnan gos ñimb rek niņiy penpen wasemb ay, pen dek pen dek giy, mindrep ginimimb anggak minim ak mindip, chapta 11:2-14:40.

Krays kumiy tip tikjakak rek, biynimb nuk gok kunep giniņgambay anggak minim ak mindip, chapta 15:1-58.

Koriyn biynimb Krays ker mindeyak gok, Ji-wdiya biynimb Krays ker mindeyak gok kuyip maniy gunap di nan-giy yokyak minim ak mindip, chapta 16:1-4.

**Minim anjjiwning angak minim ak mindip,
chapta16:5-24.**

¹ Yand Pol. Gor yip wong anjayak rek, bi Jiysis nup minim dand amemb bap mindpiyn. Miñiy mam chin Sosteniys yand yip mindiy, ² nimbip Koriyn biynimb Gor ker mindpim gok minj tiksipur. Gor nuk key nimbip biynimb sun-tep yand mindeyan angyi diniņg mey, Ñinuk Biyomb chin Jiysis Krays nup yokek apiy gek, biynimb sunrep nuk mindpim. Kun ak nimbip minj tiksipur. Pen minim tiksipur kun biy nimbip nep ma aspur; Biyomb chin Jiysis Krays nup Biyomb angyi angninbay gok kuyip manjysek aspur.

³ Bapiy Gor yip, Ñinuk Jiysis Krays yip nimbip simb ninjy direp ginimiy.

Pol Gor Nup Tep Angak

⁴ Pen Gor nimbip direp gip ak ninjy, nup per tep apiyn. ⁵ Yenen: nimb Krays nup chingem, nimbip direp yimb gek, gos ninrep giy, minim angnirep gipim. ⁶ Nimbip minim tep ak angniyiņg angnuk rek nep gisap. ⁷ Jiysis tip andkind winingamb angyi kond mindpim ñin biy, Gor nimbip direp yimb gakniņ, biynimb nuk ar keykey giniņgambay angak rek gipim. ⁸ Nimbip direp giyiņg nep mindeniņgamb ak mey; ñin yomb nuk ak apek minim gunap ma diniņgambim. ⁹ Gor nimbip di Biyomb chin Jiysis Krays yip jimñiy ayak ak ninbun: angak rek manjysek giniņgamb.

Krays Ker Mindpim Ak Jimñiy Mindenimimb

¹⁰ Mam ay sikop. Krays ker mindpun ak, minim gunap angyi asik keykey ma aynimimb; Gor nup

gosimb ar nokom ninjiy, jimñiy mindenimimb.
¹¹ Biyn Kilow biynimb nuk gok ap yip ninjiy, penpen angyi mindpun apay. ¹² Nimb gunap, Pol biynimb nuk mindpun apim; gunap, Apolas biynimb nuk mindpun apim; gunap, Piyta biynimb nuk mindpun apim, gunap, Krays biynimb nuk mindpun apim.

¹³ Apim kun ak Krays nup tungasik keykey aypim rek ayip. Yip mon bak biyon ñangrimbik ayey nimbip nen angyi kumen rek, yimb yip angyi Pol biynimb nuk mindpun apim. Pen Pol ker mindpun angyi ñing piknimbik? Chin Pol biynimb nuk, chin Apolas biynimb nuk apim ak; tom gipim! ¹⁴ Pen am nimb yip mindenik ñin ak, nimbip bap ma ñing pikñinik. Kriyaspas yip, Gayas yip kuyip nep ñing pikñinik. Kun ak Gor nup tep apiyn; ¹⁵ yikop ak nimb gunap Pol nup yimb angyi ñing piknuk apkip rek ayip. ¹⁶ Pen sakiy gipiyn. Stepanas biynimb nuk gok kuyip kunep ñing pikñinik. Biynimb gunap sek ñing pikñinik akan; sakiy gipiyn. ¹⁷ Krays yip biynimb gok kuyip ñing pikñinimin angyi ma angak; kuyip minim tep ak angninimin angak. Kun ak ninjiy mey, minim tep nuk ak angnimbiyn. Pen angniyiing, biynimb gunap chin nep gos tipangiy ninbun angyi apay rek, ma apiyn. Minim kun ak rek angen, biynimb gok Biyomb chin mon bak biyon ñangrimbikyak minim ak, minim yikop bap rek ayek, ma dipyap rek ayip.

Krays Nuk Nop Gor Kilis Ak Sek Mindip

¹⁸ Yenen: Krays chinup angyiy kumak minim ak, biynimb mon key yinjap amning gi mind-pay gok angon ninjiy, sakiy minim aspay angyiy kirpay; pen chinup biynimb Gor tungasik kim disap gok minim kun ak ninjiy, nuk key yimb ninjiy gip angyiy ninbun. ¹⁹ Ar kun ak Baybol buk ak tikiy angyak, “Biynimb gos tipangiy ninbun apay gok, key ninbay ar ak giy, biynimb yand ma mindeningambay angyip angyak.”

²⁰ Kun ak biynimb gos ninrep gok, biynimb sikul yomb ambay gok, biynimb minim yerip yerip ang amiy apiy gipay gok minim yomb tep tep kiyk ninbay ak, Gor ninjek, sakiy minim rek ayek, pisnep apyap pikning gispay. ²¹ Gor nuk key ninrep gip rek, biynimb gosimb chin key okok ninjun angyiy, keynep piyow ninbay gok, nuk bi yerip rek angyiy ma ninbay. Yenen: nuk key gining ninayak rek, biynimb sakiy minim chin angñimbun ak ninjiy dipay gok, piksak dip. ²² Pen Griyk biynimb gok gosimb tep tep ar gunap ninjun angyiy per piyow ninbay. Jiwda biynimb gok apay, “Tap mageprek gunap gey ninjiy, ninjind apay angningambun apay.” ²³ Kun ak mey, Krays chinup angyiy kumak minim ak angon, Jiwda biynimb gok apay, “Minim yiruk gip gok yerip aspim apay.” Griyk biynimb gok apay, “Gosimb tep tep chin piyowninbun ar ak ma aspim; ñiñlon ay apay rek aspim apay.” ²⁴ Pen chin Jiwda biynimb akan Jiwda mer, Gor diningayn angyiy angyayak gok, Ninuk nup yokek apiy kumiy, chinup di Nop yip jimñiy aysap ak; gos tipangiy ninjiy gak ak ninbun. ²⁵ Gor ninjiy gip ar ak, gos ninrep giy

ma gip rek aynıngamb ak pen; nuk niņrep giy ma giniņgamb ar gunap mindonimuņ, gos tep tep chin niņiy gipun ar ak tapin wiyniym giniņgamb.

²⁶ Mam ay sikop. Nimb key niņim! Gor biynimb nuk diyn aņgiy, biynimb yimb mindek gok, biynimb tap lum ar biy niņrep yimb gipay gok, biynimb nop nonim yimb yomb mindyıngip gok kuņay ma dak. Nimbip biynimb yikop tam okok rek mindpim gok kuņaynep dek mindpim.

²⁷ Nuk aņgak, “Biynimb sakiy sek apay gok kuyip dinikniņ; biynimb yomb mindpun apay gok, yimb sek mindpun apay gok nambinġ gek; gunap yip gosimb niņniņgiy aņgak.” ²⁸ Kun ak biynimb yimb sek mindpun apay gok gos niņyaņ aņgiy, kuyip kirgiy, biynimb tam okok yimb ma mindip apay gok kuyip dip. ²⁹ Kun gip ak biynimb bap Gor windin yirik ar ak, yimb key dand araniņgiy rek ma ayip.

³⁰ Gor Ñinuk Krays Jiysis nup chinup aņgiy yokek apiy gek mey; nup chiņgiy biynimb sakiy rek ma mindpun; biynimb suņ-tep kim kisenimb Gor dep rek gok mindpun. ³¹ Minim ar kun ak, Baybol buk ak tikiy aņgak:

“Biynimb miñmiñ gun aņgiy key ma miñmiñ giniņgiy, Gor gip rek niņiy, miñmiñ giniņgiy aņgak.”

2

Pol Krays Chinup Mon Kiros Bak Biyoņ Kumak Minim Ak Aņgñiyiņgip

¹ Pen mam ay sikop. Am nimb yip mindenik ñin ak, Gor minim niņind yimb ak aņgñiyn aņgiy,

minim kilrep wip gok ma anğñinik. ² Jiysis Krays chinup anğiy kumak minim ak nep anğñen niñningiy anğiy, ³ minim anğrep ma ginim rek ayek niñiy, jep jep diyiñg, gos yomb niñyiñg nimbip anğñinik. ⁴ Biynimb gunap minim key piyow niñiy, minim yindik andip andip ar kun ak nep rek anğun anğiy gipay rek ma ginik; Gor Kawnan ak yip gos ñakniñ anğnik ak mey; misen niñnimimb rek ayak. ⁵ Kun ak minim tep timey ar gunap niñiy, Gor nup gosimb ma niñbim; nuk biynimb diyn anğiy key yimb gip ak niñiy, nup gosimb niñbim.

Gor Gosimb Tep Tep Nuk Ak

⁶ Pen yand kunep biynimb Gor nup chiñgrep gipay gok niñiy, kuyip minim yipul yimb ak anğñimbiyn. Pen biynimb yikop gok, biyomb kiyk apyap pikniñg gispay gok sek minim yipul kiyk biynimb anğñimbay rek ma anğñimbiyn. ⁷ Minim yipul yand anğñimbiyn ak, Gor minim yipul yimb chinup dek, nuk yip mindrep giniñgambun ak anğñimbiyn. Nuk miñmon ma alwol gayak ñin ak, biynimb yerer giy diniñgamb minim ak niñak ak pen; minim kun ak weygiy rek mindyiñgip. ⁸ Biyomb ñin namb biy mindpay gok minim kun ak ma nep niñbay. Niñbiyap rek anğep, Biyomb chinup direp yimb gip ak nup, mon bak biyon ma ñanğbirik ayyiyap.

⁹ Pen Baybol buk ak tikiy anğyak, “Gor biynimb nup gok kuyip direp giniñgamb. Windin ma niñyak, anğñey ma niñyak, kun giniñgamb anğiy ma nep niñyak ak; kuyip giniñgamb anğyak.”

¹⁰ Pen minim ma niñyñgipay kun ak, Gor Kawnan nuk ak chinup yokek apiy, gos ñek niñbun. Yenen: Gor Kawnan ak Gor gip rek, giniñgamb rek, mañgiysek niñimb. ¹¹ Chin gos yerip yerip niñbun ak biynimb gunap ma niñbay, chin nep niñbun rek, Kawnan nuk ak kunep gip. Nuk Gor gip rek niñy mey, chinup gos tep kun ak rek ñek niñbun. ¹² Kawnan lum biy nimb bap ma dipun; Gor Kawnan nuk yokek dipun ak mey; chinup direp yimb giniñgamb ak niñbun. ¹³ Bi gos tipañgiy niñbay gunap, chinup minim kun ak aņgey ma niñbun; sikul aņgiy ma niñbun; Gor Kawnan gos ñimb rek minim kun ak niñy mey, biynimb gok kuyip aņgñimbun. Gor Kawnan minim aņgip ak niñiy, biynimb Kawnan nuk sek mindpay gok kuyip aņgñimbun. ¹⁴ Pen biynimb Kawnan nup ma dipay gok, minim nuk ak aņgon niñey minim rek ma ayip. Kun ak Gor Kawnan ak kiyk yip mindiy, gos ñakniñ niñniñgiy rek ayip; yikop ak niñey sakiy minim rek ayek, niñrep ma gipay.

¹⁵ Pen biynimb Gor Kawnan yip mindpay gok, kinjeñ tep ar ak timey ar ak aņgiy kasek niñiy, mindrep gey amek mey; biynimb gunap kuyip yenen kun gipim aņgiy, aņg giniñgiy rek ma ayip.

¹⁶ Baybol buk ak tikiy aņgyak:

“Biynimb an rek, Biyomb chin gos timund nuk ak kun giy mindip aņgniñgamb. Pen biynimb an rek, nup gos winjikniñgamb aņgyak.”
Pen Krays chinup biynimb nuk mindpun gok, gos nuk niñimb rek ñakniñ, niñrep gipun.

3

Bi Gor Woŋg Nup Giñemb Gok

¹⁻² Mam ay sikop. Nind nimb yip mindenik ñin ak, Krays biynimb nuk mindyĩngipim ak pen; gos yomb nimb ak amyĩngip tap man ar biy ker gok. Ñapan ñaŋ tiy ñiñemb rek ak mindyĩngipim: biynimb yomb tap key ñimbay rek ma mindyĩngipim. Kun ak nimbip Gor minim gunap aŋgñinik, gunap aŋgñen ma niñnimimb rek ayek ma aŋgñinik. Mindpun ñin biy kunep, tap lum ar biy gos niñyĩng nep mindpim rek, Gor nup gosimb niñbim ak, ñapan ñaŋ gosimb niñbay rek nep niñbim. ³ Miluk niñiy, penpen aŋgiy mindpim ak; biynimb yikop gok gipay rek gipim. ⁴ Gunap, “Apolas biynimb nuk mindpun apim;” gunap, “Pol biynimb nuk mindpun apim,” Kun ak nimb biynimb yikop gipay rek gipim.

⁵ Apolas chirmiñay biyomb yerip rek mindor, minim kun ak apim. Chir bi yikop ominiñal ak pen; Gor aŋgek, minim tep nup ak aŋgñor niñiy nup dipik.

Pen chirupmiñay woŋg ar keykey aŋgayak rek gipur. ⁶ Yip aŋgek, miñmon nimb ak amiy tap yin ak yimnik. Apolas nup aŋgek kisen amiy, ñiñg am mal dap, tap yimnik kun ak songak. Pen Gor nuk nep gek jakak. ⁷ Kun ak, chir bi yikop tap yin yimiy, ñiñg songiy gipur ak, yimb chirup ma dand aranimimb. Gor gek jakak rek, yimb nup ak dand aranimimb. ⁸ Biynimb tap yin yimbay gok, biynimb ñiñg dap sopay gok woŋg ar nokom yimb gipay ak mey, woŋg gipay gipay rek niñiy, kuyip

pey ñiningamb. ⁹ Chirminḡay Gor woḡg ak jimñiy gipur; woḡgday nuk ak nimb mindpim.

Gor Korip Nuk Gayak Ak Nimb Mindpim

Pen minim bap: nimb biynimb Gor ker mindpim gok, Gor korip nuk rek mindpim. ¹⁰ Yip simb niḡy dek, bi korip nup gep ak mindiy, korip sap yomb namb biyaḡ ak piḡiyen, biynimb gunap apiy day day mindip gok kisen gispay. Pen ap korip kun ak giniḡg, niḡrep giy nokom giniḡgiy. ¹¹ Gor korip nuk ak, Jiysis Krays nup sap yomb namb biyaḡ pisnep piḡiyip ak; biynimb gunap tuḡgjiw yokiy, kisenimb bap piḡiyiniḡgiy rek ma ayip.

¹² Pen korip day day mindek gispay ak, biynimb gunap gol, siylpa, kamb teprep dapiy giniḡgambay; gunap mon alik tap tiḡiy monmon okok dapiy giniḡgambay. ¹³ Pen woḡg yerip yerip giniḡgambay ak; Krays apiy sup ñek yinek, maḡiysek niḡniḡgambay. ¹⁴ Korip day kilis mindeniḡgamb gok pey ñiningamb. ¹⁵ Day pisnep yinpaḡg yowniḡgamb gok pey ma ñiningamb. Biynimb korip yinpaḡg yowniḡgamb day kun gok giniḡgambay gok, nuk yip kim mindeniḡgambay ak pen; simbgeprek korip yinek, tap ma mindip rek gok mindeniḡgambay.

¹⁶ Gor Kawnan nimb yip nep mindip ak, korip ñiluk miḡgan tep nuk ak rek mindpim! ¹⁷ Biynimb gunap Gor korip ñiluk miḡgan nuk asikrep gep ak, gi timey geniḡgambay, kuyip pen kunep gi timey giniḡgamb.

*Chin Nep Biynimb Gos Niņep Mindpun Anġiy,
Ma Anġnimimb*

¹⁸ Niņrep ginimimb. Nimb gunap gos yomb biynimb yikop gok piyow niņbay rek nep niņiy, biynimb gos niņep mindpun anġniņgambim ak pen; sakiy ayek kun anġniņgambim. Biynimb sakiy sek mindpun anġiy mey, gos tep ak piyow niņniņgambim. ¹⁹ Pen biynimb yikop minim yomb yomb rek anġiy niņbay gok, Gor niņek sakiy minim rek ayip. Baybol buk ak tikiy anġyak, “Biynimb gos tipanġiy niņiy; niņrep gipun apay gok, Gor gek pisnep apyap pikniņgambay anġyak.” ²⁰ Pen minim bap sek tikiy anġyak, “Biynimb yikop gos tipanġiy niņbun apay gok, Biyomb ak niņek, minim junj bap ma mindip; yesek apay anġyak.” ²¹ Kun ak biynimb gunap kuyip, biynimb yomb mindpay anġiy yimb ma dand aranimimb. Pen biynimb akan, tap yerip yerip mindip gok, Gor nimbip niņiy gayek mindip. ²² Yand Pol, Apolas, Siypas; mankumb biy; tap yerip yerip okok manġiysek; miņiy mindpim ak, kisen mindeniņgambim ak, akan kumniņgambim ak Gor nimbip niņiy gek mey; kun giy mindiy, kun giy giniņgamb. ²³ Pen nimbik Krays ker mindpim; Krays nuk Nop Gor ker mindip.

4

Bi Jiysis Minim Dand Amemb

¹ Kun ak Apolas chirminay mey; bi Krays anġek biynimb nuk gok kuyip kond mindiy, Gor minim tep ma niņyiņġipay ak anġniņbur. ² Bi wonġ

giñemb gok, biynimb gunap kuyip kond mindeningambay ak pen, monmon giningiy rek ma mindip; Nop kiyk ak angak rek nep giningambay.

³ Pen nimb akan; biynimb gunap yip angningambim, wong nuk monmon gip angningambim ak: yikop angningambim. Nuk wong tep gip angningambim ak, kunep yikop angningambim. ⁴ Yand key mindrep gipiyn angiy ninbiyn ak pen; minim kun ak rek Gor nuk key angningamb. ⁵ Kun ak miñiy minim kun ak rek ma angnimimb. Biyomb key apiy, minim kun ak rek angningamb. Weygiy gipay gok, misen gipay gok mangiysek misen angningamb. Gos yerip niniy nup wong giñimbay ak kunep niniy angningamb. Kun ak mey, ñin kun ak biynimb mangiysek gipay gipay rek kuyip minim tep angningamb.

Koriyn Biynimb Yimb Kiyk Key Dand Aranyak

⁶ Pen mam ay yand gok. Minim apiyn kun ak, Apolas chirminay apiyn ak pen; nimbip angñirep gispiyn. Nimb key gos tipangiy ninbun angiy key tep gakniñ, bi nimbip minim angñimbay gunap kuyip yimb dand aranying, gunap kuyip ma kirginimimb aspiyn. Pen Baybol buk tikiy angyak rek ginimimb; gos key ninbim rek ma ginimimb apiyn. ⁷ Gor nep gek biynimb nuk gok mindiy, gos sek mindpun. Pen gos tep ninbun ak, nuk nep gek ninbun. Kun ak yenen yimb nimbik key dand arany apim, “Chin biynimb ninrep giy, girep yimb gipun apim?”

⁸ Pen nimb key ninem, minim miker nimb gunap ma mindip! Chin mindrep yimb giy, biynimb

yomb yimb mindiy, kiyn gok mindrep gipay rek mindpun apim ak pen; am Krays yip mindiy, kiyn mindrep gipay rek mindoningambun ñin ak ma owip. ⁹ Kun ak nimb mindrep gipim ak pen; chin bi Nop angek Jiysis minim dand amemb mindpun gok, bi yikop rek ayek, chinup miluk ninjy, biynimb kunay mindpay namb ak pikayon, kuyip nambin gan angyi gos ak nep ninbay. ¹⁰ Krays nup gosimb ninjy wong tapin gon, chinup ninjey bi sakiy rek ayip; pen nimb Krays biynimb gos tipangiy ninjey nuk gok rek mindpim. Chin bi sayn; nimb biynimb kalrimey rek ayip. Chin bi yimb sek mer; nimb biynimb yimb sek gok rek ayip. ¹¹ Wosrey tikiy, mind dand apiy miñiy mindpun ñin biy, chech ma mindiy, korip ma mindiy, yiwani giy, kunjam kinjik giy, kumemb rek ay, chinup per pik gey gey kosyam yimb mindpun. ¹² Keynep tinjy yiwur giy, tap ñimbun. Chinup timey giy, angyiwiy gey; pemiy ma apun. Kuyip pen Gor kond minden angyi, nup angninbun. ¹³ Chinup minim timey angyey, pen minim sayn apun. Kun ak, chin silkul tap day day rek mindon mindon ñin biy wip.

¹⁴ Minim tiksipiyn biy nimbip angyiwiyng nambin dinjy angyi ma aspiyn; ñapan yand angyi timund winjikyng aspiyn. ¹⁵ Pen Krays minim tep ak bi gunap angyey ma dipik: yand nep angnenik ninjy dipik. Kun ak nimb ñi pañ yand. Nimb yip nap nimbik. Nimbip Krays minim angniningambay bi gok kunay yimb mindpay ak pen; nap nimbik ak yand nokom yimb. ¹⁶ Kun ak nimbip aspiyn: yand gipiyn gipiyn rek ninjy

ginimimb. ¹⁷ Ar kun ak nep, Timotiy ñi tep yand Gor minim anğñen niñrep gip ak nup yoksiyiyn. Nuk amiy, Krays biynimb nuk miñmon keykey mindpay gok kuyip, per anğñimbiyn minim ak, nimbip tip ak anğñirep gek niñrep giniñgambim.

¹⁸ Nimb gunap Pol nuk key ma winiñgamb anğiy, alemb alemb ñiyiñg mindeniñgambim ak pen; ¹⁹ Biyomb ak yaw angek, kasek niniñgayn. Amjakiy, bi yimb kiyk dand araniy yip angsikoy gipay gok, kilis kiyk yerip rek mindip anğiy niñniñgayn. ²⁰ Gor binuk yimb, nup chingiy mindpay akañ; minim nep anğyiñg gi mindpay anğiy niñniñgayn. ²¹ Kun ak yand apiy nimbip yerip ginim? Wasemb ay minim sayn anğnim akañ; minim yomb anğiy timund winjiknim?

5

Koriyn Bi Bap Nonim Andik Nup Dak

¹ Yip anğñiy apay, “Bi nimb bap nonim andik anup di mindip apay.” Pen biynimb Gor nup gosimb ma niñbay gok, tap siy tap timey kun ak rek ma gipay. ² Namam kun gek, yenen kun gipun anğiy nimbip nambiñ ma gip? Krays ker mindpim rek, namam kun ak nup angem, nimb yip ma mindonimuñ. ³ Yand paryomb akniy mindpiyn ak pen, nimbip gos niñyiñg mindpiyn. Bi tap siy tap timey gip kun ak nup, yerginiñgambun ak niñbiyn. ⁴ Nimb biynimb Krays ker mindpim gok, ap nan-giniñgambim ñin ak, Biyomb chin Krays nimbip gos ñakniñ, gos yand niñbiyn rek niñiy, ⁵ bi kun ak nup angem nimb yip lotiw ma ginimuñ. Seytan nup ñin ar ak anğ ayem nup

gi timey gek; gos niņiy, kor yomb niņep ñin ak, Biyomb ker mindonimuņ.

⁶ Pen nimb bi tap siy tap timey gip ak yip jimñiy mindiy, mindrep gipun apim ak, tep ma gip. Biret giniņg, tap yiys apay ak siskoy band gunap sesek ayey yomb yimb tan aranimb. ⁷ Nimb biret yiys sek ma mindip rek mindpim gok, yiys timey ak maņgiysek kirgiy, biynimb tep nep mindenimimb. Chin Jiwda kay Gor nup tap pik simboņgiņgipun ñin ak, tap siy tap timey, tap yerip okok asik tep yimb giyiņgipun. ⁸ Kun ak rek, Krays chinup nen kumimb aņgiy niņbun biynimb gok kunep ginjun. Biynimb gunap nep tap siy tap timey gi yomey, kuņaynep giniņgiy rek ayip. Gos kun ak niņiy, minim tep yipund giy ar ak nep aņg amiy apiy giy, mindrep ginimimb. ⁹ Nimbip minj tikiy aņgnik, “Biynimb tap siy tap timey gipay gok yip jimñiy ma mindenimimb aņgnik.” ¹⁰ Pen nimb aņgniņgambim, biynimb Krays nup gosimb niņbay gok, gosimb ma niņbay gok maņgiysek kirgiyaņ aņgiy asap aņgniņgambim. Pen ak mer. Biynimb nup ma diy, biynimb gunap tap kuyip gok chin nimb tikaņ aņgiy, biyn siy bi siy giy, tap siy diy, tap yikop gok gor chin aņgiy aņgniņbay biynimb gok, man ar biy sikoy ma mindpay. Miñmon okok maņgiysek mindpay ak, kuyip kirginjun rek ma ayip. ¹¹ Pen biynimb Krays nup diy mam ay chin apun gok tikjak, biynimb gunap tap kuyip gok yip nimb tikaņ aņgiy, biyn siy bi siy giy, tap siy diy, tap yikop gok gor chin aņgiy aņgniņiy, biynimb aņgiwiy, ñiņg kilis ñimbiy sakiy ay giniņgambay

gok; kiy yip ma tanġiy, jimñiy tap ma ñiñnimimb aṅġiy apiyn.

¹²⁻¹³ Biynimb Krays ker ma mindpay gok, yenen kun gipim aṅġiy, aṅġ ginjun rek ma ayip; Gor nep mey, minim kun gok rek kuyip aṅġniṅgamb. Pen biynimb Krays ker mindpay gok, minim kun ak rek aṅġniṅgambun. Kun ak, bi nimb tap siy tap timey gip kun ak nup aṅġem, nimb yip lotiw giyiṅ ma mindonimuṅ.

6

Biynimb Krays Ker Kor Niṅbay

¹ Pen nimb Krays ker mindpim gok, mam Krays ker mindpay gunap kuyip damem kor niṅniṅġiy ak pen, yenen bi Krays ker ma mindpay gok kuyip damem kor niṅbay. ² Chin Krays biynimb nuk mindpun gok, kisen biynimb yikop gok kuyip maṅġiysek, kor niṅniṅgambun minim ak ma niṅbim? Kor sikoy kun ak key gem kumnimuṅ ak pen; yenen bi Krays nup ma dipay gok damem, niṅbay. ³ Chin kisen enjol gok kuyip kor niṅniṅgambun ak, kor sikoy kun gok, key niṅjun. ⁴⁻⁶ Akan biynimb gos niṅep bap ma mindek, mam gunap tikjak mam gunap kuyip dam, biynimb Gor nup gosimb ma niṅbay gok kuyip aṅġem, kor niṅbay. Nimbip nambiṅ ma gip?

⁷ Pen kor minek minek gipim ak, apyap pikniṅġ gispim. Nimbip timey giy akan, tap nimbip gok piliṅġ dey; kirginimimb ak pen, yenen kuyip dand kor ambim? ⁸ Pen yerginiṅġ, namam nimbik gok key timey giyiṅġ, tap kuyip gok piliṅġ diyiṅġ gipim? ⁹ Niṅrep ginimimb. Gor

biynimb timey gipay gok kuyip diy ma kond mindeningamb. Biynimb tap yikop angninbay gok; biyn siy bi siy gipay gok; singilwan dipay gok; ¹⁰ tap siy dipay gok; biynimb gunap tap kuyip gok chin nimb tikan apay gok; ñiņg kilis ñimbiy sakiy aypay gok; biynimb gunap kuyip anjjiwpay gok; Gor kuyip diy ma kond mindeningamb. ¹¹ Nimb gunap tap siy tap timey kun ak rek giyiņgipim ak mey; minim yomb mindek, Gor yip jimñiy mindrep rek ma ayak. Pen Gor Kawnan ak nimbip gos tep ñek, Krays nimbip anjgiy kumak gos ak niņrep giy, nup chinjgiy, Gor yip jimñiy mindiy, biynimb tep nuk minim ma mindip gok mindpim.

Biyn Siy Bi Siy Ma Ginimimb

¹² Pen nimb gunap apim, “Yerer giniņg giniņgambun; minim ma mindip apim.” Kun apim ak pen, ar gunap giy mindrep ma giniņgambun; ar gunap giy gos yomb chin ar kun anep amek, kisen mindrep ginjun rek ma ayningamb. Kun ak yand tap monmon gok ma giniņgayn.

¹³ Nimb gunap pen apim, “Chinup koņgiy ayak rek tap ñimbyiņg nep mindeningambun apim.” Kun apim ak pen, Gor gek koņgiy ak sek, tap kun gok sek ma mindeningamb. Biynimb gayak ñin ak, biyn siy bi siy giniņgiy anjgiy ma gayak; yand kuyip direp giniņgayn, kiyk yip direp giniņgiy anjgiy gayak. ¹⁴ Nuk Biyomb kun ak key. Ñinuk kumek key yimb gek tikjakak rek, chinup kunep giniņgamb ak niņiy, mindrep ginjun.

¹⁵ Nimb niņbim: Krays junwon, chin ñin tomb day nuk okok rek mindpun. Kun ak

yergiy, Krays day bap dand amiy, kinjenram biyn gok yip pirengiy ayjun. ¹⁶ Baybol buk ak tikiy angyak, “Jimñiy kiner mumbwak nokom ayniᅅgamb angyak.” ¹⁷ Chin kinjenram biyn gok kuyip ker ma mindpun; Krays nup chingiy biyn-imb nuk yimb gok mindpun. ¹⁸ Biyn siy bi siy gep ar ak asikrep ginimimb. Tap siy tap timey gunap gon kun ma gip ak pen; biyn siy bi siy giniᅅgambun ak, mumbwak chin key gon timey giniᅅgamb. ¹⁹ Pen nimb niᅅbim: Gor Kawnan nuk ak yokek apiy, chin yip nep mindpun ak mey, korip miᅅgan tep nuk rek ak mindpun. Kun ak key gos niᅅbun rek gun angyi gos ak ma niᅅjun. ²⁰ Chinup kosyam yimb tuᅅgasik dek biynimb nuk mindpun ak, yimb nup aranimuᅅ ar ak nep ginjun.

7

Bi Beriymiᅅay Gok Mumbwak Kiyk Nokom Mindip

¹ Yip minj tikiy minim apik ak, nimbip pen anᅅniᅅg gispiyn. Biyn gok bi ma diy, bi gok biyn ma diy giniᅅgambay ak tep. ² Pen minek minek biyn siy bi siy gey timey gip rek, biyn gok bi kiyk key mindakniᅅ mindeniᅅgambay; bi gok biyn kiyk key mindakniᅅ mindeniᅅgambay ak tep yimb. ³ Pen nuᅅgumiy biynuk yip kiniᅅg anᅅek, yaw angyi kiniᅅgayr. Biynuk nuᅅgumiy yip kiniᅅg anᅅek, yaw angyi kiniᅅgayr. ⁴ Pen nuᅅgumiy mumbwak ak nuk key mer: biynuk yip tap kiyk jimñiy. Biynuk mumbwak ak kunep nuk key mer: nuᅅgumiy yip tap kiyk jimñiy. ⁵ Kun

ak nuᅅgumiy aᅅgek, biynuk mer ma aᅅgnimuᅅ. Biynuk aᅅgek, nuᅅgumiy mer ma aᅅgnimuᅅ. Yaw aᅅgiy kinimiyr. Pen Gor nup gosimb nokom niᅅiy, aᅅgniᅅiyiᅅ mindor aᅅgiy, minim aᅅg ar nokom ay, nup aᅅgniᅅiyiᅅ mindeniᅅgayr. Kisen tip ak kiniᅅgayr. Mer ak Seytan nimbip gek, gos gunap niᅅiy gem amek, apyap pikniᅅgambim rek ayip. ⁶ Pen low minim bap kun giy ma mindip; yand nep aspiyn. ⁷ Gos yand niᅅbiyn ak, yand yikop mindpiyn rek mindeniᅅgambim ak, tep yimb. Kun giy gos niᅅbiyn ak pen, Gor gos nuk key niᅅimb rek, chinup kilis keykey ñimb. Biynimb gunap kilis tep bap ñek, ar gunap key gipay; biynimb gunap kilis bap key ñek, ar gunap key gipay. Kun gip rek, nimb maᅅgiyseᅅ yand yikop mindpiyn rek mindenimimb aᅅgiy ma apiyn.

⁸ Pen biyn piñ bi paranj mindpay gok sek, biyn palpal gok sek yand yikop mindpiyn rek mindeniᅅgambay ak, tep yimb. ⁹ Pen biynimb gunap yikop mindiy, siy siy gun aᅅgiy gos ak nep apek, mindrep ma giniᅅgambay. Kun genimuᅅ, biyn gok bi kiyk keykey diniᅅgiy, bi gok biyn kiyk keykey diniᅅgiy. Mer ak namb kuyip biyaᅅ mon rek yinek, mindrep ma giniᅅgambay.

¹⁰ Biyn bi beryoᅅg gok, kuyip minim bap aᅅgniᅅ gispiyn. Yand nep mer: Biyomb ak minim nuk. Biyn gok nuᅅgumiy sikop kuyip ma kiriᅅ amniᅅgiy. ¹¹ Pen kiriᅅ amiy bi kisenimb ma diniᅅgiy; yikop nep mindeniᅅgiy. Bi diniᅅg, am nuᅅgumiy nindnimb anup, tip ak diniᅅgiy. Bi gok kunep, biyn gok kuyip ma aᅅgyokniᅅgiy.

¹² Pen nimbip biynimb yikop gok minim bap

anğning gispiyn. Bi Gor ker mindonimuj bap nup, biyn Gor ker ma mindonimuj bap nup nind di mindiy, “Mindoningambur” angek, biyn Gor ker ma mindip angyi, nup ma angyoknimuj. ¹³ Pen biyn Gor ker mindonimuj bap, bi Gor ker ma mindonimuj bap nup nind di mindiy, “Mindoningambur” angek, bi Gor ker ma mindip angyi, ma kiring amnimuj. ¹⁴ Pen bi Gor ker mindonimuj ak, biyn Gor nup gosimb ma niymb ak dipiyn angyi, ma angyoknimuj. Yip mindiy, Gor ñin ar ak mindeningambiy. Pen biyn Gor ker mindonimuj ak, nuᅅgumiy nup ma kiring amnimuj. Yip mindiy, Gor ñin ar ak mindeningayr. Ñapan kiy tikningayr ak minim ma mindip; Gor dinimuj rek nep mindeningamb.

¹⁵ Bi beryoᅅ diy mindipay gok, nuᅅgumiy nep Gor ker mindek, biynuk Gor ker ma mindiy, kilis giy nuᅅgumiy nup kiring amning gonimuj; biyn yand angyi ma dirbiknimimb, yaw angem, amnimuj. Mer ak penpen giy, mindrep ma giningambim.

Pen biyn ak Gor ker mindek, nuᅅgumiy Gor ker ma mindiy, kilis giy biynuk nup kiring amning gonimuj; bi yand angyi ma dirbiknimimb. Yaw angem, amnimuj. Mer ak penpen giy, mindrep ma giningambim. Biyomb chin ak kapkap mindrep giyaᅅ angyi chinup dip.

¹⁶ Pen nimb biyn Gor ker mindpim gok, nuᅅgumiy yip nep mindem, Gor nup chingningiy rek ayip ak: ma niymbim? Nimb bi Gor ker mindpim gok, biyn nimbik yip nep mindem, Gor nup chingningiy rek ayip ak; ma niymbim?

17 Biynimb Gor ker mindpay miñmon okok mañgiysek, kuyip per apiyn, “Nimb yerer giy rek mindem Gor nimbip dak ak niñiy, ar kun ak nep mindenimimb apiyn.” 18 Pen bi kumbak sek mindey Gor kuyip dip gok, kumbak ma tikniñgiy. Bi kumbak tikey kuyip dip gok, tip ak poñgwir ma giniñgiy. 19 Kumbak tikiy akan, ma tikiy, Gor binuk mindpay ak, minim ma mindip. Pen Gor añgip rek niñiy gipun ak tap yomb yimb.

20 Nind yerer giy rek mindem Gor nimbip dak ak, ar kun ak nep mindenimimb. 21 Nimbip gunap bi gunap tawiy dam woñg kuyip ak añg ayey, pey ak ma diy, apay apay rek giy kalambis woñg rek gipim. Pen Gor nimbip dip rek, kuyip kiring amjun añgiy gos ak ma niñnimimb. Pen kisen kirgiy yikop mindep rek ayonimun, kirgiy yikop mindenimimb. Pen biyomb apay rek kisen gipim ak, nimb nep ma gipim; 22 Krays chinup dek, biynimb nuk mindpun gok mañgiysek, añgip rek kisen gipun. Pen tap siy tap timey giy kalam-bis rek mindon Krays chinup dek, miñiy kind nup okok ken mindiy, mindrep gun añgiy gos ak niñnimimb. 23 Gor Ñinuk ak timey giyñgipim ak niñiy, sanj yomb yimb rek gek, biynimb nuk mindpim. Gos kun ak niñiy, biynimb Gor minim aspun añgiy yesek apay gunap, ap minim ar gunap key añgeniñgiy, kuyip ma kisen ginimimb. 24 Kun ak mam ay sikop. Yerer giy rek mindem Gor nimbip dak ak; ar kun ak nep mindenimimb.

Biyn Piñ Bi Paranj Gok Kuyip Minim Ak

25 Pen biyn dep bi dep minim ak añgning gispiyn. Minim kun biy Biyomb ak añgek niñiy

nimbip ma aspiyn. Pen nuk yip simb ninjiy diy kond mindip rek, nimbip minim yesek gunap ma anḡniḡayn. ²⁶ Miñiy kosyam mindep rek ayip ñin biy, mindpim rek nep mindenimimb. ²⁷⁻²⁸ Nimb bi biyn sek akan, biyn bi sek mindpim gok, biyn chin gok kuyip akan, bi chin gok kuyip kirgiy, yikop mindon anḡiy ma anḡnimimb. Pen nimb biyn sek ma mindpim gok, bi sek ma mindpim gok, biyn dun bi dun anḡiy gos ak ma niḡnimimb. Pen diniḡgambim ak minim ma mindip. Diy mey, miker keykey diniḡgambim gos ak ninjiy aspiyn.

²⁹ Mam ay sikop. Minim aspiyn kun ak, Biyomb chin Krays maḡ mindip wiñḡamb ak, biyn sek bi sek mindpun anḡiy gos yomb ma niḡjun; Gor ker mindpun anḡiy gos yomb ak niḡjun. ³⁰ Chin biynimb simb gek siy anḡep rek mindpun gok; gos kun ak ma niḡiy, yikop mindpun rek mindonjun. Biynimb miñmiñ gep rek gakniḡ mindpun gok; gos kun ak ma niḡiy, yikop mindpun rek mindonjun. Biynimb tap tawpun gok; biynimb tap ma mindip rek mindonjun. ³¹ Biynimb tap lum ar biy niḡyḡ diyiḡ mindpun gok; tap kun gok niḡon tap yomb rek ma aynimuḡ. Yenen: mankumb biy key kindiknimb ayñḡamb ñin ak maḡ mindip.

³² Yip tep gip ak, nimbip miker yomb ma ginimuḡ. Bi biyn ma dipay gok Gor nup gosimb niḡiy, yergen Bapiy Gor nup tep giniḡamb anḡiy niḡniḡambay. ³³ Bi biyn sek gok, yergen biyn yand ak nup tep giniḡamb anḡiy, tap lum ar biy gos yomb ak niḡiy gey amniḡamb. ³⁴ Kun gek, nuk gos omiḡal niḡniḡamb. Biyn bi ma dipay gok, Gor nup gosimb niḡiy mindrep giy, nup nep

gosimb niñun aᅅgiy niñningambay; pen biyn bi sek gok yergen, bi yand ak nup tep giniᅅgamb aᅅgiy, tap lum ar biy gos ak niñiy gey amningamb.

³⁵ Minim aspiyn kun biy, nimbip mer aᅅgiy ma aspiyn; nimbip gos niñiy, Biyomb ak nup gosimb niñyᅅg, mindrep gim aᅅgiy aspiyn. Yikop ak gos omiᅅal niñiy, nup direp ma giniᅅgambim.

³⁶ Pen bi gunap yikop mindey, kuyip biyn dap ñey, yand bi woskey mindeniᅅgayn aᅅgiy, mind dand amiy, biyn kun ak nup niñey mindrep rek ma ayek akan, biyn yimgeprek mindek niñiy, diniᅅgambay ak tep. Minim ma mindip. ³⁷ Pen bi woskey kun gok rek, nup nembnemb giy mer; Gor nup nep gosimb niñiyn aᅅgiy, biyn ma diy, kilis yimb giy mindeniᅅgambay ak, kunep minim ma mindip. Tep yimb giniᅅgambay. ³⁸ Kun ak bi biyn kuyip aᅅgyak ak dipay gok tep dipay. Pen biyn ma diy, yikop mindiy mindrep gipay gok, tep yimb gipay.

³⁹ Biyn gok nuᅅgumiy sikop mindyakniᅅ, yip nep mindeniᅅgambay. Kumek nep mey; am bi kisen diniᅅg, diniᅅgambay. Pen bi Gor ker mindeniᅅgiy gok nep diniᅅgiy. ⁴⁰ Pen gos yand niñbiyn ak: yikop mindpay rek mindeniᅅgiy ak, tep yimb. Yand nep mer: Gor Kawnan ak, yip gos ñakniᅅ aspiyn rek ayip.

8

Tap Pik Chip Day Tap Gok Simboᅅgipay Ak Niñjun Akan Mer Aᅅgyak

¹ Pen biynimb yikop tap yesek aᅅgnᅅbay gok, kuyip tap simboᅅgiy pikey niñjun akan ma niñjun

anġiy yip anġniġbim minim ak, nimbip pen anġniġ gispiyn. Nimb gunap apim, “Chin biynimb gos niġep mindpun. Tap ñiġemb tap gunap simboġġiy pikpay ak ñiġniġ ñiġniġgambun apim.” Apim kun ak Gor nup wasemb ay, biynimb gok kuyip wasemb ay ma apim.

² Biynimb gos niġep yimb mindpun apay gok, minim niġniġġiy ak ma niġy, kun apay. ³ Pen Gor nuk biynimb nup gosimb nokom niġy wasemb aypay gok, biynimb yand anġiy niġimb.

⁴ Pen tap kiyk simboġġipay kun gok chin niġbun: tap mer; Gor nep mey, Biyomb yimb. ⁵ Biynimb gunap tap chin anġniġbun mey ak anġiy, biyomb chinup kond mindonimuj mey ak anġiy, tap keykey semb biyoġ man biy anġniġbay ak pen; ⁶ Gor chin ak nokom yimb mindip. Nuk Bapiy chin tap okok maġġiysek gayek mindip. Nuk mindakniġ chin mindpun. Ñinuk Biyomb chin Jiysis Krays kunep nokom nep mindip. Nuk mindek mey, tap maġġiysek gayrik. Nuk mindakniġ chin mindpun. Tap gunap simboġġipay gok yikop simboġġipay.

⁷ Pen biynimb gunap minim kun ak ma niġbay rek, nimb Gor nup chinġrep gipim gok, tap simboġġiy pikpay kun gok monmon ñimbeneġgambim, kiyk kunep ñimbey, chin Gor ker mindpun rek, yenen tap simboġġiy pikpay ak ñimbspun anġiy, gospar aying ñimbey, Gor niġek tep ma giniġgamb. ⁸ Pen tap asikpun akan monmon ñimbun ak, minim ma mindip.

⁹ Pen nimb biynimb niġrep gipim gok, tap bap ñimbon, mam ay niġrep ma gipay gok niġy kunep

giy, apyap pikningiy rek ayip ak niñiy, tap kun ak ma ñiñnimimb. ¹⁰ Yenen: nimb biynimb niñrep gipim gok, am gor yesek angninbay korip miñgan ak amiy, tap ñimbem, mam ay niñrep ma gipay gok, ap nimbip niñiy kiyk kunep ñiñningiy rek ayip. ¹¹⁻¹² Kun ak nimb niñrep gipun angyi gem, mam ay Krays dininḡ kumak gok gospar ayinḡ kunep giy, apyap pikningambay. Giningambim ar kun ak, kuyip direp ma giy, Krays nup direp ma giy giningambim. ¹³ Kun ak tap ñiñemb gunap ñimben, mam ay gunap ñimbiy apyap pikningiy rek ayek niñiy, tap kun gok ma ñiñnim.

9

Pol Pey Ma Dak Ak Nup Tep Gak

¹ Yand bi Jiysis minim dand amemb mindpiyn rek, tap bap yip kinjeñ ma tikip; nimbip wong giñimbiyn rek, yip tap gunap ñinimimb angninḡ ap-nip. Akan yand bi Jiysis minim dand amemb ma mindpiyn. Nimb niñbim: yand Biyomb chin Jiysis nup windin niñiy, minim tep nup ak anḡnen, nimb diy mey; biynimb nuk mindpim. ² Biynimb gunap yip bi yikop angyi niñningiy rek ayip ak pen, nimbip minim tep anḡenik niñbik rek, yip niñrep gipim. ³ Biynimb gunap yip minim yomb anḡey, kuyip pen apiyn, “Biyimb Gor minim tep ak anḡen, nup chinḡipay gok kuyip windin ma niñbim ak mey, yip minim yomb aspim apiyn.”

⁴ Nimbip wong giñimbiyn rek, pen tap keñmanḡiy tap gok dinim rek ma ayip? ⁵ Wong nimbip gipiyn rek, yand pen ay Jiysis nup chinḡip bap diy, dand minim tep anḡñiranḡyinḡ, tap

ñinjur rek ma ayip? Piyta sek, bi Jiysis minim dand amemb gunap sek, mam yikop gunap sek per biyn kiyk gok sek dand tanğey, kuyip direp gipay. ⁶ Akan Banabas chirminay nep kinjen bap ma mindek, maniy wong piskind ak giying tap ñimbur.

⁷ Bi amiy gok wong gipay rek, tap kiyk key ma piyow ninbay. Kuyip tap ñey ñimbay. Bi tap yimbay gok, yimbay rek pipang dapiy ñimbay. Bi kaw mokpay gok, mokpay rek, tiy mik diy ñimbay. ⁸ Minim aspiyn kun ak ninem, Gor minim rek ma ayip, biynimb gos timund key ninijy apay rek ayip? ⁹ Pen Mosis Gor low minim ak tikiy angak:

“Kanj kaw gok ponind apiy, wiyt tawsimb jakey mangiy ak key ay cheng ak key ay gan angiy, dap ayem wong giyakniñ, meng mingan kuyip ak ma tiwningrimbiknimimb; wong giningambay rek gunap ñinñingiy angak.”

Gor kanj kaw gok gosimb ninijy minim kun ak ma angak; ¹⁰ chinup gos ninijy angak. Biynimb tinijy yiwur giy wong gi yimbay gok, biynimb pang dand opay gok, kuyip gunap ñey ñimbying, tep gakniñ wong giningiy angak. ¹¹ Nimbip permindep minim tep ak anğon ninijy dipim rek, chinup pen tap lum ar biy mindip gok ñiningambim ak tep yimb. ¹² Pen biynimb gunap nimbip minim tep ak angñey, maniy tap gok ñimbim rek, Apolas chir nimbip per angñor ninbim ak, ma ñiningambim? Pen nimbip angniñijy maniy tap gok diprup ak pen; dor, biynimb gunap chirup Gor minim tep ak ma angñiraspiyr, maniy nen asimb anğraspiyr

anġiy, Krays minim tep ak ma niñningambay ak niñiy, maniy tap nimbip gok ma diy, chir key maniy wong giy, tap taw ñimbying anġñirapur.

¹³ Pen nimb niñbim: Gor anġek, biynimb nup anġniñep korip miñgan wong gipay gok, tap opriyñ dap yokpay gunap diy, tap kiyk taw ñimbay. Biynimb Gor wong giying, tap pik sim-bongipay gok kunep, gunap diy ñimbay. ¹⁴ Kun ak rek Biyomb anġek, biynimb minim tep nup anġñimbay gok kuyip, pen tap ñey ñimbying mey, mindrep giying wong kun ak giniñgambay.

¹⁵ Pen nimbip Gor minim tep ak anġñirangen dipim rek, maniy tap keñmanġiy nimbip gunap ma dipiyn ak; yip tep yimb gip. Miñiy minj tiksipiyn biy, tap nimbip gunap diyn anġiy ma aspiyn. Mer yimb! Nimb gos yomb kun ak niñnimimb rek ayek, yip wak tikip. Kun gek yand nind kumbinip ak, tep yimb.

*Biynimb Kuñaynep Gor Ker Mindeyan Anġiy,
Pol Kalambis Wong Rek Gak*

¹⁶⁻¹⁷ Pen minim anġñirapiyn ak, nimb gunap niñiy anġniñgambim, “Gor nup key yimb gisap anġniñgambim.” Pen ak mer. Wong nup gipiyn kun ak, nuk ginimin anġak rek nep gipiyn; key yimb ma gipiyn. Pen pey ma diy, nimbip wong yikop gi ñimbiyn ak, nuk yip niñek tep giniñgamb anġiy, miñmiñ yimb gipiyn. ¹⁸ Pen maniy tap gok ma dipiyn ak, pey yand rek mey, Jiysis minim tep ak, biynimb okok kuyip yikop yimb anġñimbiyn. ¹⁹ Yand bi taw dap ayey, kalambis wong rek giñemb bap ma mindpiyn ak pen;

biynimb kuṅaynep Gor ker mindeyañ aṅgiy, biynimb miñmon keykey kuyip kalambis woṅg rek gipiyn. ²⁰ Jiwda biynimb mindpay namb ak amiy, Krays minim tep ak aṅṅnen niṅyañ aṅgiy, kiy yip mindyṅg, tap kiyk asikpay gok asikpiyn. Kun ak Jiwda low minim kisen gipay namb ak, yand yip wilikiy mindon yip niṅey, bi kiyk bap rek ayip. ²¹ Pen biynimb Jiwda low minim ma niṅbay namb ak amiy, Krays minim tep ak niṅyañ aṅgiy, kiyk yip yṅgongṅ giy minden niṅey, bi kiyk bap rek ayip. Pen kun giy, monmon giyṅg Gor nup minim ak ma kirpiyn; Krays aṅgip aṅgip rek nep gipiyn. ²² Biynimb Gor ker mindiy, aṅgip ar ak niṅrep ma gipay namb ak amiy, Krays minim ak aṅṅnen niṅrep giyañ aṅgiy, kiy yip yṅgongṅ giy minden niṅey, bi kiyk bap rek ayip. Kun ak biynimb miñmon keykey mindpay gok, kurginiṅgiy rek ayek niṅiy, gunap Krays nup dey kuyip tungasik dinimuñ aṅgiy, kiy yip wilikiy aṅgrop gipiyn. ²³ Gipiyn kun ak, minim tep aṅgip ar ak gen amek, mindrep giyn aṅgiy gipiyn.

Kilis Yimb Giy Gon Amek Mindrep Yimb Giniṅgambun

²⁴ Nimb niṅbim: biynimb resis gipay gok, kuṅaynep resis gipay ak pen, bi nind amjakpay gok wiyn giy tap dipay. Kun ak rek, nimb kunep kilis giy, resis rek ginimimb. ²⁵ Biynimb resis giy wiyn gun apay gok, monmon ma gipay; asikrep giy, tap kuyip kilis ñiniṅgamb ak nep ñimbiy, resis giy wiyn gipay. Tap sikoy per ma mindeniṅgamb gok diniṅg kun gipay; chin resis gipun ak, junj ak mindakniṅ gipun. ²⁶ Kun ak

mey, yand resis gipiyn ak, kilisrimey giy gipiyn. Key okok ma niñbiyn; amning gipiyn miñgan ak nep niñiy, kasek ambiyn. Pen bi kochiñ pikpay gok, monmon ma pikpay, niñrep giy pikpay rek ak gipiyn. ²⁷ Biynimb gunap kuyip anğñen niñbay ak pen; yand key apyap piknim rek ayip ak, niñrep giy nokom gen amjap.

10

Basind Apis Sikop Kuyip Gak Ak Sakiy Ma Ginjun

¹ Yenen: mam ay sikop. Chin Jiwda, basind apis chin wosrey gok, miñmon nep namb okok tanğyিং kumyak kesim ak niñbim. Kiyk miñmon Yijip mindiy, Gor semb band tikiy kuyip yiw giy kond mindyিং, yip am am ñiñg solwara Likañ apay ak gek, liñg pis pis amek, kind bindoñ amniyak. ² Gak kun ak mañgiysek niñiy anğyak, “Mosis biyomb chin Gor minim anğip ak, anğniñgamb rek giniñgambun anğyak.” Miñiy ñiñg pikñimbay rek, semb band ak sek, ñiñg Likañ kun ak sek kuyip gak kun ak, Mosis minim ak diniñgambun anğyak. ³ Biynimb kun gok mañgiysek miñmon nep namb okok amniyakniñ, Gor Kawnan ak, tap keñmañgiy ñakniñ, ñimbyiñg amniyak. ⁴ Pen ñiñg ñiñemb ak ma yimb mindek, Gor Kawnan ak gek kamb namb ak wikiy apek, mañgiysek ñiñyak. Ñiñg kun ak kamb kiyk yip ameyak namb ak wikiy apek ñiñyak. Kamb kun ak mey, Krays nep. ⁵ Kun ak mañgiysek nup chingniñgiy ak pen, kuñay yimb nep nuk anğak rek ma niñey, nup yiruk gek, kuyip dand miñmon amning gak

ak ma dand amek, miñmon nep namb kun okok kinrañgiy, tokiy ay kumyak.

⁶ Pen kuyip yerer gak kesim tikyak ak, Gor chinup gos tep niñningiy añgiy gek, Baybol buk ak tikyak. Kun ak kiyk tap Gor mer aᅅgak gok dun dun añgiy giyak rek ma ginjun. ⁷ Kiyk tap yesek gok simbonᅅyিং, aᅅnñyিং giyak rek ma ginjun. Kiyk giyak ar ak tikiy aᅅgyak, “Bisgiy tap ñimbying, ñing ñimbying, tikjak koᅅgim paᅅyিং gey amnak aᅅgyak.”

⁸ Pen gunap kunep biyn siy bi siy giy, ñin nokom tiwendiy chiriy tawsin (23,000) kumyak rek, chin kun ma giy, asikrep ginjun. ⁹ Gunap Biyomb chin anup alemb alemb ñey; nuk gek ñom kondkol gok, kuyip siwey kumyak ak kunep, niᅅrep ginjun. ¹⁰ Gunap Gor nup aᅅjiwey, enjol biynimb pikayep gok ap, kuyip pikayey kumyak.

¹¹ Gor kuyip gak kun ak, biynimb gos niᅅyaᅅ aᅅgiy gak. Pen chin biynimb Krays tip asaw aᅅgiy kond mindpun ñin biy niᅅyaᅅ aᅅgiy, Mosis kesim kun ak tikayek, Baybol buk biyaᅅ riyt giy niᅅbun.

¹² Pen biynimb key niᅅrep gipun aᅅnñgambay gok, apyap pikningiy rek ayip ak, niᅅrep ginjun.

¹³ Tap siy tap timey ginjun aᅅgiy gos ar keykey wip ak chinup nep ma gip; biynimb okok kuyip kunep gip. Gor chinup aᅅgak rek kond nep mindeningamb ak mey, nuk gek, gos niᅅnñgambun kun ak tapin apiy, chinup aybiriknimuᅅ rek ma aᅅnñgamb. Nup chingiy nep mindiy mey, nuk gek tap timey kun gok asikrep ginjun rek aᅅnñgamb.

Biret Kind Nokom Tipaᅅg Ñimb Ak, Kiñiᅅ

Nokom Mindpun

¹⁴ Kun ak biynimb tep yand gok. Tap yesek, tap yikop gok ma simboḡnimimb. ¹⁵ Nimb biynimb gos timund sek mindpim ak mey, minim aḡḡniḡ gispiyn ak, niḡind akaḡ aḡḡiy, nimb key niḡnimimb. ¹⁶ Ñiḡ wayn ak diy, Gor nup tep aḡḡiy ñimbun ak, likañ nuk yowak rek, Krays yip jimñiy mindpun aḡḡiy ñimbun. Pen Gor nup tep aḡḡiy, biret tipaḡ ñimbun ak; mumbwak nup timey giyak rek, chinup direp gip aḡḡiy ñimbun. ¹⁷ Chin biynimb kuḡaynep biret kind nokom tipaḡ ñimbun ak, biynimb nuk kiñiḡ nokom mindpun aḡḡiy gipun.

¹⁸ Pen Jiwda kay gipay ak niḡbim. Meymey siypsiyp tap gok dand apiy, Gor nup simboḡḡniḡ piḡpay ñin ak, biynimb apiy yip ñimbay gok, gos ar nokom mindek mey, jimñiy ñimbay. ¹⁹ Pen tap ñin maḡḡiy silok gay simboḡḡipay gok, tap niḡind yimb aḡḡiy nimbip ma aspiyn. ²⁰ Biynimb ma niḡbay gok, tap yesek kun gok aḡḡniḡsipun aḡḡiy, kichekiy malñiluk tap gok nep aḡḡniḡiy; Gor nup ma aḡḡniḡbay. Kun ak mey, nimb kiyk yip jimñiy ar nokom kun anep mindeniḡgambim ak; tep ma yimb giniḡgamb aḡḡiy aspiyn. ²¹ Biyomb chin anup aḡḡniḡiy, ñiḡ wayn sek, biret sek ñimb molik biyaḡ ay; Seytan nup simboḡḡiy ñiḡ tap ñiḡemb nuk ak, ñimb ar biyoḡ ma ayjun. ²² Pen kun giniḡgambun ak, Biyomb chin ak, chinup miluk niḡaḡ aḡḡiy giniḡgambun. Chin biynimb yomb yimb; Gor bi yikop aḡḡiy, kun ak rek ginjun?

²³ Biynimb gunap apay, “Tap ñiḡemb tap gunap

simbonjiy pik dap maker aypay gok ñiñning, tawiy ñiñgambun. Low bap kun ak rek ma mindip ak, monmon tawiy ñiñningambun apay.” Ak kun apay ak pen, ar kun ak nep niñiy giniñgambun ak, tep ma giniñgamb. Monmon giniñgambun kun ak, biynimb gunap niñiy kunep giy, yenen Gor nup kun gipun anjiy, gos kuñaynep niñningambay. ²⁴ Chin mindrep giniñgambun ar ak nep niñiy ma ginjun; biynimb gunap kuyip gosimb niñiy, kiy mindrep giniñgiy ar ak niñiy ginjun.

Gor Nup Yimb Ak Perper Nep Dand Aranjun

²⁵ Pen tap pik maker aypay gok, chipday tap gok simbonjiy dap maker aypay akan anjiy gos yomb ak niñiy, minim kun ak ma angninimimb; monmon tawiy ñiñnimimb. ²⁶ Yenen: Baybol buk ak tikiy angyak, “Miñmon tap okok manjiysek, Gor chinup niñiy gayak angyak.”

²⁷ Pen biynimb Gor ker ma mindpay gunap nimbip, “Apem tap ñiñun angeniñgiy;” nimb korip kuyip amning, gos kuñay ma niñnimimb. Monmon amiy, tap dap ñiñningiy gok monmon ñiñnimimb. ²⁸⁻²⁹ Pen am mindiy nimbip, “Tap ñiñning gispun biy, tap yesek gok simbonjiy pik dap aypun angeniñgiy,” ma ñiñnimimb. Nimb ñiñning ñimbikip ak pen; kiyk gos kuñay niñningiy rek ayek, kuyip nen anjiy, kirginiñgambim. Pen nimb gunap angninñgambim, “Chinup yenen gos kuñay niñningambay. ³⁰ Tap ñiñemb kun gok, Gor nup tep anjiy ñiñningambun ak; yenen chinup gos kuñay niñningambay angninñgambim.” ³¹ Kun angninñgambim ak pen, tap ñiñning akan, yerer

gining, Gor nup yimb dand aranemb ar ak nep ginjun. ³² Jiwda biynimb akan, Griyk biynimb akan, Gor biynimb nuk gok niñey; tep ma giningamb ar ak niñiy, ma ginjun. ³³ Yand gipiyn ak; yip key tep ginimun ar ak ma gipiyn; biynimb gok Gor nup gosimb niñey, kuyip dinimun angyi ar ak nep gipiyn.

11

¹ Kun ak nen, yand Krays gip ar ak niñiy gipiyn rek, nimb yand gipiyn ar ak niñiy ginimimb.

Biyn Gok Lotiw Namb Ak Jun Pikyiwginginyi

² Nimbip Gor minim angnen niñdiy, niñying nep mindpim ak; tep yimb aspiyn. ³ Pen miñiy angning gispiyn ak niñnimimb. Biyomb chin Krays Nop angyip rek niñiy gip; bi gok Krays angyip rek niñiy gipay; biyn gok nunyumiy kiyk apay rek niñiy gipay. ⁴ Pen bi gok biyn kay gipay rek, jun ak pikyiwgiy, biynimb gok kuyip minim angneningambay akan, Gor nup angneningambay ak; Biyomb chin ak, bi yikop par bap rek ayek kun giningambay. ⁵ Pen biyn gok bi kay gipay rek, jun ak misen mindakniñ, minim angneningambay akan, Gor nup angneningambay; nunyumiy sikop kuyip tap yikop par bap rek ayek, kun giningambay. ⁶ Pen biyn gunap jun kas ma yiwginjun angyi, jun kas kiyk ak tik man giy akan, pisnep tikyokniñgiy. Pen ar kun ak nambin gonimun, jun ak tomb yiwgiy nep minim angninyi. ⁷ Gor bi gok kuyip nundkaw rek gayek mindpay ak, jun kiyk ak ma pikyiwginginyi. Pen biyn gok, bi gok rek gayek

mindpay ak, jun kiyk ak pikyiwgiy nep, minim anğñiniñgiy. ⁸ Gor biyn tıñglım kind ak diy, bi ma gayak; bi tıñglım kind ak diy, biyn gayak. ⁹ Pen biyn kondep bap ma mindip anğiy, nuñgumiy nup ma gak; bi kondep nup bap ma mindip anğiy, biynuk nup gayak. ¹⁰ Ar kun ak enjol niñmindpay rek, biyn gok jun pikyiwgiy mindiy, nuñgumiy anğnimuñ rek giniñgiy.

¹¹ Pen biyn gok kuyip ma anğ sikoy ginimimb. Biyomb chin ak bi gok kuyip diy, biyn gok kuyip ma kirgip; biyn diy bi diy gip. Kun ak biynimb nup ker mindpim gok; biyn asik key ay, bi asik key ay geniñgambim, tep ma giniñgamb. ¹² Gor nind bi tıñglım kind ak diy, biyn ak gayak. Miñiy biyn gok mindiy mey, ñapan tikyakniñ, bi gok mindpun. Pen Gor nuk junj ak mey, biynimb tap okok mañgiysek nuk kond mindip. ¹³ Pen biyn gok jun ak misen mindakniñ, Gor nup anğniñniñgambay ak, tep giniñgamb akan, nimb key niñnimimb. ¹⁴ Yand niñbiyn, chin bi gok jun kas paryomb mindeniñgamb ak, tep ma giniñgamb. ¹⁵ Biyn gok nep jun kas paryomb jakip rek, jun kiyk ak pikyiwgiy mindeniñgiy anğiy gak. ¹⁶ Pen biynimb gunap minim aspiyn kun ak niñiy minim mindonimuñ, anğniñ anğniñgiy. Yand pen gipiyn gipiyn rek ak aspiyn. Biynimb Gor ker mindpay miñmon okok kunep, ap nan-giy, aspiyn kun ak rek nep gipay.

Biret Sek Ñiñg Wayn Sek Ñiñniñg Girep Ma Giyak

¹⁷ Minim bap anğniñg gispiyn. Per ap nan-giy, miñ tep ar ak ma gipim. Kun ak nimbip

minim tep aņgnim rek ma ayip. ¹⁸ Biynimb gunap apay, “Ap nan-giy minim apim ñin ak, asik keykey aypim aņgey,” minim kun ak gunap gem, niņind apay aņgiy niņbiyn. ¹⁹ Pen gos ar keykey niņiy gem amjap kun ak, biynimb gok mindrep gipay; biynimb gok mindrep ma gipay aņgiy, misen yimb niņningambun. ²⁰ Pen ap nan-giy tap ñimbim kun ak, Biyomb biret wayn tap gok jimñiy ñiņnimimb aņgak rek ma ñimbim; yesek ar ak gipim. ²¹ Mam ay gunap yiwan nep mindyakniņ, kuyip gos niņiy mer; nimb gunap tap yomb ñimbis, ñiņ wayn kuņay ñimbis sakiy aypim. ²² Pen korip nimb ma mindek lotiw mindep tip ak amiy; tap ñimbyiņg, ñiņ ñimbyiņg gipim? Akan, Gor nup niņem, tap yikop bap rek ayek kun gipim? Mam ay yiwan nen mindpay gok kuyip, nambis yomb ñimbim kun ak, nimbip yerip aņgnim? Mindrep gipay aņgnim? Mer! Nimbip kun ma aņgniņgayn.

Jiysis Binuk Gok Kuyip Biret Wayn Ñak

²³ Yand nimbip biret wayn ñiņningambim rek minim aņgnik ñin ak, gos yand key niņiy ma aņgnik; Biyomb chin ak yip gos ñak ar ak nep aņgnik. Pen Jiysis nup mimuņg niņyak ñin ak, kisyim apek, tap ñiņning giy, nuk biret ak diy, ²⁴ Gor nup tep aņgiy, tipaņg binuk gok kuyip ñiyiņg aņgak, “Tip nimbip ak diy kumnim apiyn rek, mumbwak yip di monmon giņiņgambay. Kun ak rek biret tipaņg aysi piyn biy diy ñimbyiņg, yip gosimb niņnimimb aņgak.” ²⁵ Pen tap ñimbdeyak, ñiņ wayn ak kunep di kap miņgan ak soņgiy, kuyip ñiyiņg aņgak,

“Gor kisen giningayn angyi minim angyak ar ak; likañ yip yowningamb rek, nuk yip jimñiy mindeningambim ak mey; ñing wayn kun biy, yip gosimb niñying ñiñnimimb angak.” ²⁶ Kun ak Jiysis ma andkind wip ñin biy, biret wayn ñimbying nep mindem mey; biynimb gok Jiysis chinup kim dining kumak ak niñingiy.

Asik Tep Giy Biret Wayn Ñiñnimimb

²⁷ Pen biynimb gunap gosimb niñiy mer, biret wayn monmon diningambay ak; Biyomb chinup angyi kumimb mumbwak likañ nup ak, tap yikop rek ayek, kun giningambay. Gor niñek tap siy tap timey giningambay. ²⁸ Kun ak yergiy rek mindpim ak key niñiy, Gor yip jimñiy mindying nep biret wayn ak ñiñnimimb.

²⁹ Biynimb Jiysis chinup angyi kumimb gosimb ak niñiy mer; biret wayn monmon ñiñningambay gok; kiyk key yiwur dining kun giningambay. ³⁰ Ar kun anep, biynimb nimbip gunap mawses giy, tap giy gip; gunap pisnep kumbay. ³¹ Gos niñrep giy ñiñningambun ak, minim yomb ma diningambun. ³² Pen biynimb nuk mindpun rek, mindrep ma gon, chinup timund winjikningamb. Timund winjikek mey, gos niñiy, biynimb man ar biy monmon gipay gok yip, mon key yinjab ak ma amningambun.

³³ Pen mam ay sikop! Tap ñiñning ap nan-giy, biynimb gunap tawsak ay ma ñiñnimimb; kuyip kond mindiy, jimñiy ñiñnimimb. ³⁴ Pen yiwan gek, korip nimbik okok tap ñimbiy winimimb. Mer ak monmon giy, minim yomb diningambim.

Minim day gunap, kisen mindpim ak amiy, anjñirep giningayn.

12

Gor Kawnan Ak Kilis Ñakniñ Biynimb Nuk Gunap Kuyip Direp Gipun

¹ Pen mam ay sikop. Miñiy Gor Kawnan ak kilis keykey ñek, wong ar keykey gipun minim ak, nimbip anjrep gining gispiyn. ² Nimb niñbim: nind Krays nup ma dipik ñin ak, tap gos ma mindip gok nimbip gos lip gek, tap yesek kun gok anjñiñ mindyngipim. ³ Kun ak nimbip anjrep gen, niñrep ginimimb. Gor Kawnan ak gos ñakniñ, Biyomb chin ak nup ma anjjiwningambay. Pen nuk gos ñek nep, Jiysis Biyomb chin anjgiy, biynimb gok kuyip anjñimbay.

⁴ Gor Kawnan ak gos tep ñakniñ, wong ar keykey gipun ak pen, Kawnan nuk keykey ma mindip; nokom yimb mindip. ⁵ Wong ar keykey giyng, Biyomb chin ak nup direp gipun ak pen, nuk kunep nokom yimb. ⁶ Gor chin nokom yimb mindip rek, chinup kilis keykey ñakniñ, wong ar keykey giyng nup direp gipun.

⁷ Gor Kawnan chinup kilis keykey ñek, wong ar keykey gipun kun ak, biynimb nuk gok manjiysek direp gon, mindrep giyañ anjgiy gip. ⁸ Gor Kawnan ak chinup biynimb nuk gunap gos tep ñek, minim nup ak niñiy apun. Pen Kawnan nokom kun ak chinup biynimb gunap gos ñek, Gor minim tep nuk kiñiñ ak niñiy anjñimbun. ⁹ Kawnan nuk nokom kun ak chinup gunap gos

ñek, Gor nup gosimb niñyinq key yimb gipun: gunap biynimb tap gip gok gon jakambay; ¹⁰ gunap tap mageprek gok gipun; gunap Gor minim nup gunap niñiy aᅅñimbun; gunap Gor Kawnan akan, tap yerip rek biynimb bak ayek gipay ak niñbun; gunap minim yimb keykey apun; gunap minim yimb keykey aᅅgey niñiy, tunᅅandikiy biynimb gok kuyip aᅅñimbun.

¹¹ Pen Gor Kawnan nokom yimb mindip ak, gos key niñimb rek, chin biynimb nuk mindpun gok, kilis keykey ñakniñ, woᅅg ar keykey gipun.

Woᅅg Ar Keykey Giy Krays Nup Direp Gipun

¹² Mumbwak chin nokom yimb mindip ak pen, day nuk kuᅅaynep mindip. Kun ak rek, chin Krays biynimb nuk gok mindpun. Chin kuᅅaynep woᅅg ar keykey gipun ak pen, biynimb kiñiñ nokom yimb mindpun. ¹³ Chin Jiwda biynimb gok, Jiwda mer gok; biynimb yimb mindip gok, yimb ma mindip gok Gor Kawnan nokom kun anep, chinup maᅅgiyseᅅ ñiᅅg rek pikñek, Krays mumbwak nuk nokom rek mindpun.

¹⁴ Mumbwak ak nokom ak pen, day nuk kuᅅay mindip. ¹⁵ Tomb kind ak, ñin kind ak niᅅek nuk yomb rek ayek, yand sikoy aᅅgᅅniᅅgamb ak; yikop aᅅgᅅniᅅgamb. Kiyk mumbwak nokom mindiy, woᅅg jimñiy gipiy. ¹⁶ Timund ak, windin ak niñiy, nuk yomb yand sikoy aᅅgᅅniᅅgamb ak yikop aᅅgᅅniᅅgamb. Kiyk mumbwak nokom ayek, woᅅg jimñiy gipiy.

¹⁷ Pen chinup gayak ñin ak, windin okok maᅅgiyseᅅ gaypikop ak; yergiy minim aᅅgey timund pik niñbinup? Pen timund maᅅgiyseᅅ nep

gayambikop; yergiy kuy puᅅg niᅅbinup. ¹⁸⁻¹⁹ Kun ak rek, chin Krays biynimb nuk mindpun gok maᅅgiysek ar nokom ma gipun. Gor Kawnan ak key niᅅek tep gip rek, kilis keykey ᅅakniᅅ, ar keykey gipun. ²⁰ Kun ak mey, mumbwak nokom ak pen; day nuk kuᅅaynep mindip.

²¹ Pen windin ak, ᅅin kind ak yenen yand yip mindip; woᅅg nuk bap ma mindip aᅅgiy, asik am keynep mindiy, mindrep ma giniᅅgamb. Jun won ak, tomb kind ak yenen yand yip mindip; woᅅg nuk bap ma mindip aᅅgiy, asik am keynep mindiy, mindrep ma giniᅅgamb. ²² Mumbwak day gunap, day gunap kuyip woᅅg nimb bap ma mindip aᅅgiy, asik keykey ay, mindeniᅅgiy rek ma ayniᅅgamb.

²³ Mumbwak chin day yikop gok, chech mokyaᅅ tap gok ay gipun rek, yimb dand aranbun. Day biynimb niᅅey, tep ma giniᅅgamb aᅅgiy pikyiwgipun gok, per direp gipun kun ak rek, yimb dand aranbun. ²⁴ Kun ak rek nep, chin Krays biynimb kiᅅniᅅ nuk mindpun. Biynimb yimb ma mindip gok, Gor gek yimb mindip. ²⁵ Asik keykey ma ayniᅅgiy aᅅgiy, nuk gek biynimb yimb ma mindip gok yimb dey, biynimb nuk gunap yip, andip andip rek mindiy mey, penpen simb niᅅbay. ²⁶ Pen day bap miker gek niᅅey, maᅅgiysek simb gip; pen day bap mindrep gek niᅅey, maᅅgiysek tep gip.

²⁷ Chin Krays kiᅅniᅅ nuk mindpun gok, ᅅin kind tomb kind nuk ak mindiy, aᅅgip rek gipun. ²⁸ Biynimb kiᅅniᅅ nuk mindpun namb ak, nuk chinup aᅅgayip rek: nind bi Jiysis minim dand

amemb gok mindpun; namb ak bi Gor minim anjep gok mindpun; namb kanen ak minim nup angnemb tiysa gok mindpun; gunap tap mageprek gok gipun, gunap biynimb tap gip gok kuyip gon jakambay; gunap biynimb simb niñiy direp gep gok mindpun; gunap biynimb gok kuyip kond mindnukniñ, mindrep gipay; gunap minim yimb keykey gok apun.

²⁹ Pen chin mañgiysek bi Jiysis minim dand amemb ma mindpun. Mañgiysek bi Gor minim anjep ak ma mindpun. Mañgiysek tiysa ma mindpun. Mañgiysek tap mageprek gok ma gipun. ³⁰ Mañgiysek biynimb tap gip gok gon ma jakambay. Mañgiysek minim yimb key gunap ma apun. Mañgiysek minim yimb keykey apay rek niñiy, tungandikiy biynimb gok kuyip ma angnimbun. Yenen: Gor Kawnan ak chinup kilis ar keykey ñimb rek, nup woñ ar keykey gipun.

³¹ Kun ak Gor Kawnan chinup kond mindakniñ, Gor nup woñ tep yimb bap ginjun angyi, ginimimb.

Pen miñiy nimbip tep yimb giniñgamb ar ak angning gispiyn.

13

Penpen Wasemb Ayep

¹ Chin biynimb gunap kuyip wasemb ma ay, yikop kuyip minim yimb keykey angningambun akan, enjol minim apay rek angningambun ak, tep ma giniñgambun. Kun gon bel ak pikey pikey, biynimb gok timund pikniñiy, kirpay rek nep

ayningamb. Pen biynimb wasemb ayningambun ak tap yomb yimb.

² Chin Gor biynimb nuk mindpun gok; gunap Gor minim anjep gok mindeningambun, gunap gos tipangiy key yimb niñningambun; gunap Gor nup gosimb niñiy, yirik won gunap anjon key okok amningamb. Pen ak minim yomb mer; ak yikop kun giningambun. Tap yomb yimb mey; biynimb gok kuyip wasemb ayningambun ak.

³ Pen tap chin mangiyse mindip rek, bilok biynimb tap ma mindip gok kuyip ñiningambun akan; Gor wonq ak ginukniñ, biynimb gunap chinup miluk niñiy, mon yinimb namb ak diyokekey kunningambun ak; Gor nup tep giningamb angingambun ak pen, wasemb ma ayningambun rek, giningambun kun ak tep ma giningamb.

⁴⁻⁵ Pen biynimb Gor nup wasemb ay, biynimb gunap kuyip wasemb ay gipay gok, mind tep yimb gipay. Biynimb gok kuyip simb niñiy mey, kuyip timey gey, kal ma jiwpay; biynimb gunap tap tep dey, kuyip miluk ma niñbay; chin key biynimb yomb mindpun angiy monmon ma gipay; kapkap mindrep yimb gipay. Tap tep gunap niñiy mapin ma aypay; biynimb niñiy miluk sek ma mindpay; kuyip timey gey, gos kun ak niñying ma mindpay. ⁶ Miñ timey ar ak kuyip tep ma gip; Gor miñ ar ak kuyip tep gip. ⁷ Pen miker yerip yerip gunap kuyip apek, Gor nup ma kirpay; nup chingiy mindpun ak, mindrep yimb giningambun angiy, tep gakniñ nep mindpay.

⁸ Pen kisen Gor Kawnan chinup gos ñek minim nup anğñimbun ak; ma anğñiniᅇgambun. Chinup gos ñek minim yimb keykey apun gok, ma anğniᅇgambun. Day niᅇbun miñ ak kunep, puᅇgrikniᅇgamb ak pen; wasemb aypun miñ ak, per yimb nep mindeniᅇgamb. ⁹⁻¹⁰ Yenen: chin miñiy ar ar nep niᅇiy anğñimbun; kisen ar ar niᅇbun rek kirgiy, niᅇrep yimb giy mindeniᅇgambun.

¹¹ Miñiy ñapan ᅇaᅇ gos niᅇiy apay rek anᅇon wip; pen kisen biynimb yomb niᅇiy apay rek anᅇyiᅇg; ñapan ᅇaᅇ gos niᅇiy apay rek ak kirginiᅇgambun. ¹² Miñiy ñiᅇg kawnan paᅇgniᅇbay rek ak niᅇbun: kisen ñin kun ak, Krays chinup niᅇrep giᅇ rek ak, nup niᅇrep giniᅇgambun.

¹³ Kun ak minim yomb omiᅇal nokom mindip: Gor nup gosimb niᅇep ak; nup gos sek kond mindep ak; wasemb ayep ak. Pen minim yomb yimb ak mey, wasemb ayep ak.

14

Gor Kawnan Nimbip Bak Ay Mindakniᅇ, Minim Keykey Apim

¹ Gor chinup kond mindakniᅇ, biynimb gok kuyip wasemb ay, direp giᅇjun anᅇnimimb. Kun ak Gor nup woᅇg nuk ar gunap giᅇjun anᅇyiᅇg, biynimb gok kuyip minim nup anğñemb rek ayniᅇgamb ak, tep yimb kun giniᅇgambim. ² Pen alemb andik mandik giy, Gor minim anᅇniᅇgambim ak, minim yerip aspay anᅇiy, ma niᅇniᅇgambay; Gor nep niᅇniᅇgamb. ³ Gor minim misen anᅇgem mey, biynimb niᅇiy mindmaᅇgiy

limgek, Gor nup direp yimb giniᅇgambay. ⁴ Kun ak, biynimb Gor Kawnan gek, alemb andik mandik giy Gor minim apay gok, keynep anᅇyᅇᅇ niᅇyᅇᅇ giy, Gor nup direp giniᅇgiy rek ayip ak pen; biynimb Gor minim misen anᅇᅇniᅇgambay gok, minim anᅇrep gey, Gor biynimb nuk kuᅇaynep niᅇiy, nup niᅇrep giniᅇgambay. ⁵ Nimb maᅇgiysek alemb andik mandik giy Gor minim anᅇniᅇgambim ak, yip tep giniᅇgamb ak pen; tep yimb giniᅇgamb ak, minim nup misen anᅇᅇniᅇgambim. Misen anᅇᅇniᅇgambim, biynimb niᅇiy, Gor nup direp giniᅇgambay. Pen alemb andik mandik giy anᅇniᅇgambim, biynimb gunap minim kun ak niᅇiy, junj anᅇip ak kun kun giy mindip anᅇiy, biynimb gok anᅇᅇniᅇgambay nep, Gor nup gosimb ak niᅇrep giniᅇgambay.

⁶ Pen yand mindpim ak amiy, minim yimb key bap anᅇyᅇᅇ, Gor minim anᅇniᅇgayn; nimb yergiy niᅇiy, Gor nup chᅇᅇrep yimb giniᅇgambim. Pen Gor yip gos ᅇek anᅇen akaᅇ, gos timund yip wip rek gunap anᅇen akaᅇ, Gor minim tep nuk gok anᅇᅇen niᅇem mey, Gor nup chᅇᅇrep yimb ginimimb rek ayᅇniᅇgamb.

⁷ Giyta, gawimb tap okok pikey, biynimb gunap yergiy, minim asap mey ak anᅇiy niᅇniᅇgambay? Tap gos niᅇep rek, kun kun aspun anᅇey niᅇniᅇgiy.

⁸ Pen biykul ak kunep punᅇey anᅇrep ma gek, an tikjakiy penpen giniᅇᅇ gispun anᅇiy, kond mindeniᅇgamb? ⁹ Kun ak rek mey, nimb biynimb gok kuyip, minim yimb key bap anᅇiy Gor

minim ak anğñeningambim; yergiy minim aspay ak anğiy, niñningambay. Nimbik keynep anğ anğ kirginingambim.

¹⁰ Pen man ar biy minim yimb keykey mindip rek, minim kiñiñ ak mindakniñ apay; yikop ma apay. ¹¹ Biynimb gunap minim anğey ma niñningambun ak, chinup niñey, biynimb paryomb okok nimb rek aynıngamb. Chin pen kuyip niñon, kunep giniñgamb.

Minim Yimb Keykey Anğniñg, Gos Niñrep Giy Anğnimimb

¹² Nimbip kun ak rek nep giniñgamb ak, niñrep ginimimb. Gor Kawnan chinup gos ñakniñ, wonğ nup ak gun anğiy kilis gipim ak; niñrep giy, biynimb nuk gok kuyip, direp giniñgambim ar gok nep ginimimb.

¹³ Pen alemb tuñğandikek minim yimb keykey anğniñg, Gor nup anğniñem, nimbip gos ñakniñ, kun kun aspun anğyiñg anğñinimimb. ¹⁴ Mer ak, minim yimb keykey anğyiñg, Gor nup anğniñniñgayn ak pen, minim kiñiñ aspiyn ak anğiy ma niñniñgayn; biynimb gok kunep ma niñniñgambay. Namb yand biyan key kun anğan anğek nep anğniñgayn. ¹⁵ Kun ak yand minim yimb keykey anğiy, Gor nup anğniñniñg akan, kamep anğniñg; gos niñyiñg, biynimb niñniñgiy rek ar ak nep anğniñgayn. ¹⁶ Nimbip Gor Kawnan ak gek, minim yimb keykey anğyiñg, Gor nup tep anğem, tep giniñgamb ak pen; biynimb gok kiyk ma niñiy, yergiy nimb yip yiñgong giy, Gor nup tep anğyiñg mindeniñgambim? ¹⁷ Gor nup tep anğyiñg mindeniñgambim ak pen; kiyk minim

kun ak niņiy rek, Gor nup gosimb niņningiy. Minim ak kiyk key aspay aņgiy niņningambay.

¹⁸ Pen Gor Kawnan gek, minim yimb keykey apun ak, nimbip nep ma gip; yip kunep gek, minim yimb keykey kuņaynep per apiyn ak, nup tep apiyn. ¹⁹ Pen biynimb ap lotiw mindyakniņ, minim yimb key okok nimb bap aņgon ma niņningambay ak; minim niņbay ak nep misen aņgon, yip tep giniņgamb.

²⁰ Pen mam ay sikop. Ñapan ņaņ niņbay rek nep ma niņnimimb: biynimb yomb gosimb niņbay rek niņnimimb. Tap siy tap timey gep ar ak nep, ñapan ņaņ rek mindenjun.

²¹ Jerusalem biynimb wosrey, Gor nup kir-giyak rek, bi Gor minim aņgep Asaya Baybol buk ak tikiy aņgak, “Gor aņgip, ‘Yand biynimb guniy timund winjikniņg, biynimb par okok nimb aņgen apiy, minim yimb kiyk aņgyakniņ, biynimb guniy ma nep niņningambay aņgip’ aņgiy” tikayak. ²² Kun ak niņbun: Gor Kawnan ak gek, minim yimb keykey apay ak, biynimb nup gosimb ma niņbay gok niņningiy aņgiy gip. Pen gek minim tep misen aņgñimbay ak, biynimb nup gosimb niņbay gok, nup direp yimb giniņgiy aņgiy gip.

²³ Pen nimb Gor biynimb nuk mindpim gok, ap nan-giy, alemb tuņgandikek minim yimb keykey aņgiy Gor minim aņgeniņgambim; biynimb Gor ker ma mindpay gok nimbip niņiy, biynimb gok sakiy ayek aspay aņgniņgambay. ²⁴⁻²⁵ Pen Gor minim misen aņgñiyiņg mindem, biynimb kun

gok rek gunap ap niñiy, tap siy tap timey kapkap gipay gok, gos yomb yimb niñiy, Gor nup niñey jel gek, kongim yimiy, yimb nup dand aranying angningambay, “Niñind! Gor yip mindpim angningambay.”

Lotiw Ak, Yipund Giy Nep Ginimimb

²⁶ Kun ak mam ay sikop. Yand aspiyn: ap nan-giningambim ñin ak, bap kamep angningamb; bap minim angniningamb, bap Gor gos ñimb rek minim ak angniningamb, bap minim yimb keykey angy angningamb; bap minim angningamb kun ak, tungandikiy kun kun giy angy angningamb. Kun ak mey, biynimb niñiy mindrep giningiy ar gok nep ginimimb. ²⁷ Pen alemb tungandikiy minim yimb keykey angning, biynimb ominal akan, ominal nokom nep angningiy. Kunaynep ma angningiy. Pen biynimb nokom bap tikjakiy minim angek, bap pen, kun kun giy angy angnimun. ²⁸ Pen minim kun kun giy angy angy angninimun bap ma mindonimun; alemb tungandikiy angningamb ak, minim kun ak biynimb gok kuyip ma angnimun, nuk key kapkap Gor nup angninying mindonimun. ²⁹ Biynimb ominal akan, ominal nokom, Gor minim tep ak angniyakniñ, biynimb gunap Gor minim ak yipund giy aspay akan, yesek aspay angy, jonimb kind ak niñmindeningiy. ³⁰ Pen biynimb yikop niñmindeningambay kun gok, gunap Gor Kawan ak gek, gos tep pangyikek, bi nind tikjakiy angnimun ak, gos kun ak niñiy bisgek, bi kisen ak tikjak angnimun. ³¹ Kun ak nimb mangyisek

minim tep ak, aņg dand amiy apiy giy mey, Gor nup gos ak niņrep giy, mindrep giniņgambim.

³² Pen biynimb Gor minim aņgep gok, joņimb kiyk key kond mindyिņg, minim aņgep won ak nep apay. ³³⁻³⁴ Yenen: Gor gek biynimb nuk gok monmon ma gipay; gos niņyिņg gey amek, kapkap mindrep gipay.

Pen nimb ap nan-giy, biyn gok bi rek minim ma aņgniņgiy. Bi gok aņgey, biyn gok yikop niņniņgiy. Krays biynimb nuk miñmon okok, kun ak rek nep gipay. Baybol buk tikyak minim ak, kunep kun ak rek nep mindip.

³⁵ Pen biyn gok minim gunap sek niņun aņgiy, korip okok amiy, nuņgumiy sikop kuyip aņgniņey, aņgñirep giniņgiy. Lotiw namb ak biyn tikjakiy minim aņgñeniņgambay, tep ma giniņgamb.

³⁶ Akaņ nimb nep Gor minim ak niņrep gipim, biynimb okok ma niņbay? ³⁷ Biynimb Gor Kawnan yip mindpun apay gok sek, biynimb minim nup aņgep mindpun apay gok sek yand Gor aņgip rek nep aspiyn ak niņniņgiy. ³⁸ Pen biynimb gunap minim kun biy ma niņey, minim aņgniņgiy ak ma niņnimimb.

³⁹ Kun ak mam ay sikop. Gos yomb nimb ak Gor minim aņgñinjun aņgiy niņnimimb. Pen biynimb alemb tuņgandikiy minim yimb keykey aņgyiņg Gor minim apay gok kuyip, kirgim ma aņgnimimb. ⁴⁰ Pen kilpul aņgyiņg monmon ma ginimimb, niņrep giyiņg gem amnimuņ.

15

Krays Kumiy Tip Ak Tikjakak

¹ Mam ay sikop. Krays minim angenik diy mindrep gipim ak, sakiy ginimimb rek ayip angyi, tip ak angnirep gining gispiyn. ² Minim tep kun ak nimbip angen ninjy dipik ak mey, Gor nimbip dek, biynimb nuk mindpim. Pen mer ak biynimb nuk ma mindembikip.

³⁻⁴ Minim yomb yand niņnik ak, nimbip angyi angnik, “Chin tap siy tap timey gipun rek, Jiysis chinup nen angyi kumek komey, ñin ominjal nokom mindiy, tip tikjakak ak mey; Baybol buk ak tikiy giningamb angyak rek nep gak angnik.”

⁵ Pen Jiysis kumiy tip ak tikjakiy, Piyta mindek sinjak misen gek, nup nind niņak. Kisen misen gek, bi minim nup dand amemb anep wimingan ak niņyak. ⁶ Kisen tip ak misen gek, mam ay payp handret rek niņyak. Mam ay kun gok gunap kumyak; pen maņgiysek rek mindpay. ⁷ Kisen ñin bap misen gek, Jemis niņak. Ñin bap pen, bi minim nup dand amemb gok kiyk maņgiysek niņyak. ⁸ Pen biynimb gunap nup niņyak ñin ak apiy pandikek, kisen yand kunep nup niņnik. Kun ak yand ñapan tikrep ma gipay rek bap mindenik yip dak.

⁹ Yand bi timey biynimb nuk gok kuyip, timey yimb giyngipiyn ak; Jiysis minim nup dand amemb bap mindenim rek ma ayak ak pen; ¹⁰ Gor yip simb ninjy dek, binuk mindiy, key yimb gipiyn. Bi minim nup dand amemb gunap wong gipay rek ma gipiyn; yip simb ninjy direp yimb gek, wong yomb yimb ak gipiyn. ¹¹ Yand nep Gor nup wong ak gipiyn angyi ma angningayn; kiy nep gipay angyi ma angningayn; chin maņgiysek

Krays minim tep ak, ar nokom angnon amek, nimb ninjy dipim.

Biynimb Kumyak Gok Tip Tikjakningambay.

¹² Pen Krays kumiy tikjakak angyi minim per apun ak, nimb gunap yenen ma ninjy apim, “Biynimb gok kumiy tip ak ma tikjakpay apim?”

¹³ Pen angningambun kun ak, Gor Krays nup gek tip ak ma tikjakip angyi angningambun.

¹⁴ Pen Krays tip ma tikjapikop ak, minim tep apun ak minim rek ma ayek, nup gosimb ninjy chingipik ak, ma chingipikip. ¹⁵⁻¹⁶ Biynimb kumiy ma tikjakep rek ayombikop, Krays nup gek ma tikjapikop. Gor gek tikjakak minim tep per apun ak, yesek nep apnup. ¹⁷ Pen minim angnuk ak diy, Gor biynimb nuk mindpim rek ma mindembikip; biynimb tap siy tap timey giy, pisnep kumbay rek ak mindembikip. ¹⁸ Biynimb Krays nup chingiy kumyak gok, am Gor yip mindeningiy rek ma aypikop.

¹⁹ Chin Krays nup diy mey, gos sek mindpun. Pen lum ar biy mindiy, pisnep kumbinup rek ayip angyi, biynimb simbgeprek yimb gok mindombinup. ²⁰ Pen Gor gek Krays tikjakiy nup ker amek mey, biynimb nup ker mindpun gok, kunep giningambun ak ninrep gipun.

²¹ Andam gek, biynimb kind nuk ak mangyisek kumbay; Krays gek, biynimb kind nuk ak mangyisek tikjakningambay.

²² Minim aspiyn kun ak, Andam biynimb kind nuk ak mangyisek kumingambay; Krays biynimb kind nuk ak mangyisek kim mindeningambun angyi aspiyn. ²³ Pen Gor Krays

nup nind gek tikjakiy, am nuk yip mindip ak mey, kisen apiy biynimb nup ker mindpun gok gek, maŋgiysek tikjakningambun. ²⁴ Ñin kun ak ñin kisen yimb winingamb ak mey; biynimb, tap yerip yerip nuk kond mindeningamb gok maŋgiysek, Nop nup angek kond mindeningamb. ²⁵ Yenen: Krays biynimb tap okok kond mind dand amiy, Nop gek; biynimb yomb, biynimb tam okok; kichekiy, malñiluk tap yerip yerip mindip gok, Krays beŋ okok mindeningambay. ²⁶ Ñin kun ak kunep gek, biynimb gok tip ak kumningiy rek ma ayningamb.

²⁷ Pen Nop biynimb tap okok maŋgiysek, Ñinuk Krays beŋ okok ayningamb angyiy tikyak ak, Nop nup sek ma angyak. Nuk nep gek, Ñinuk Krays nup beŋ okok mindeningambay. ²⁸ Chin biynimb tap okok maŋgiysek, Ñinuk Krays beŋ okok mindnukniŋ, nuk angningamb, “Bapiy miñiy, nand biynimb tap okok maŋgiysek kond mindeningamban. Yand beŋ nip okok mindeningayn angningamb.” Kun ak mey, Nop biynimb tap okok maŋgiysek yimb kond mindeningamb.

²⁹ Biynimb kumbay gok, tikjakningambay apiyn ak niŋbim. Pen Gor gek ma tikjakningambay angyiy, biynimb gunap yenen, numiy numam kumbay gok kuyip nen ñiŋ pikpay? Kiyk tikjakningiy angyiy nep kun giningambay. ³⁰ Pen chin kunep, kumiy tikjakningambun ak niŋiy, chinup per timey giniŋ gipay ak, gos yomb ma niŋbun. ³¹ Minek minek Gor nup angninyiŋ apiyn, “Kumning kumningayn. Minim ma mindip apiyn.” Yand nep Gor minim angenik niŋiy dipik ak mey,

biynimb mapin yand mindpim. Nimbip niñind apiyn. ³² Pen miñmon Yipiyses biy apiy, minim tep ak aṅṅniyn aṅgiy, kayn ayndik gok yip penpen gipiyn. Biynimb gunap apay rek, kumiy pisnep kumningambun aṅgiy apnıp ak; “Miñiy mindpun ñin biy, tap tep tep ñimbyiṅ, ñiṅ kilis ñimbyiṅ gi mindonjun; kumiy pisnep kumningambun apnıp.”

³³ Pen biynimb gos kun ak rek niñbay gok, yip ma mindenimimb. Biynimb mindrep gipay gok, biynimb timey gipay gok yip yiṅgoṅgiy, ar kun ak nep giniṅgambay. ³⁴ Pen gos key niñiy timey gipim ak kirgiy, mindrep ginimimb. Nimb gunap Gor nup gosimb ak ma niñbim ak pen; nambiṅ ma gip.

Tip Ak Tikjakiy Key Yimb Mindpay

³⁵ Pen nimb gunap, biynimb kumbay gok yergiy rek tikjakniṅgambay; mumbwak kiyk ak yerip rek mindeniṅgamb aṅgiy niñbim? ³⁶ Nimbip sakiy ayek kun giy niñbim! Tap yiṅ maṅgiy gok yokon, wak ak sek mindiy ma jakip; kuyiṅ yapiy nep jakip. ³⁷ Pen lays maṅgiy, wiyt maṅgiy akan, tap yerip maṅgiy yokpun ak, jak yomb gip rek ma jiw yimbun; maṅgiy sikoy gok nep yokon jakip. ³⁸ Pen maṅgiy keykey yokpun kun gok, Gor jaknimuṅ aṅgiy niñayak rek jakip.

³⁹ Mumbwak gok kunep keykey mindip. Biynimb gok key ayak; kimin, kayn, kanj gok key ayak; piys gok key ayak; yakir gok key ayak. ⁴⁰ Mumbwak man ar biy ker gok key mindip; semb biyoṅ ker gok key mindip. Man ar biy ker tep ñiluknimb gok key mindip; semb biyoṅ ker

tep ñiluknimb gok key yimb mindip. ⁴¹ Pen pumb melik tep ak key ay, takin melik tep ak key ayak. Gap melik tep ak key mindip. Pen gap gok kunep keykey mindip. ⁴² Biynimb kumiy tikjakpay mey, kun ak rek. Kumon kaw dingingambay mumbwak ak key mindip; tikjakiy per mindoningambun mumbwak ak key mindeningamb. ⁴³ Kaw dipay mumbwak ak perper mindonimuj rek ma ayip. Tikjakningambun mumbwak tep yimb ak, Gor yip perper mindeningamb. ⁴⁴ Lum ar biy mumbwak mindip rek kumbun; tikjakning mumbwak tep ak diy, tikjakningambun. Gor chinup mumbwak lum ar biy gayek mindpun rek ak; nuk yip mindep ak, kunep gayek mindeningambun.

⁴⁵ Baybol buk tikiy angyak, “Gor Andam nup gay, meñg miñgan pungek, añiñ ay, biyimb ayak angyak.” Pen Andam kisenimb ak nuk key Kawnan ak mey, biynimb gek perper mindeningambay. ⁴⁶ Kun ak mey, nind mumbwak yikop ak diy mindiy; kisen Gor yip mindep mumbwak tep ak dingingambun. ⁴⁷⁻⁴⁸ Bi Andam nindnimb ak man ar biy nimb; bi Andam kisenimb ak semb biyon nimb. Biynimb mangiysek Andam nup man diy, gayek mindyngip rek mindpay; pen biynimb Krays nup dipay gok, nuk semb biyon mindip rek ak mindeningambay. ⁴⁹ Miñiy mindpun ak, Gor man diy gayak bi ak rek mindpun; pen kisen Bi semb biyon nimb awak ak rek mindeningambun.

⁵⁰ Mam ay sikop. Nimbip aspiyn: mumbwak yikop ak, Gor biynimb nuk diy kond mindeningamb namb ak, amnimuj rek ma ayip. Tap

kasek tokiy ay kum kuyiņg yowip ak, perper mindonimuņ rek ma ayip.

⁵¹ Pen nimbip minim ma niņyīņgipay bap aņgning gispiyn. Chin Krays biynimb nuk mindpun gok maņgiysek ma kumningambun. Gunap kumiy, mumbwak kisenimb diniņgambun; gunap kim mindiy, mumbwak kisenimb ak diniņgambun. ⁵² Ñin kun ak biy kul kisen ak aņgek, kasek aņiņak rek diy, biynimb nuk kumningambun gok, mindoningambun gok maņgiysek, mumbwak kisenimb ak diniņgambun. ⁵³ Mumbwak chin kuyiņg yowep ak perper mindonimuņ rek ma ayip; pen miņiy mindip ak gek, kim kisenimb ayek mey, perper mindonimuņ rek ayningamb. ⁵⁴ Ñin kun ak minim tikiy aņgyak rek giniņgamb. Minim kun ak tikiy aņgyak, “Biynimb kumyīņgipay rek ma kumningambay aņgyak.” ⁵⁵ Pen biynimb ma kumningambay rek kamep bap tikyak ak, Gor aņgak,

“Kilis nand akay? Chim yakam nand akay mindok, biynimb yip gok gey kumningambay?”

⁵⁶ Low mindakniņ, tap siy tap timey gipun gok, tap yomb yimb ayek, pisnep kumemb rek ayip.

⁵⁷ Pen Gor chinup aņgiy, Jiysis Krays nup yokek apek, biynimb nup ker mindpun gok, kumiy pisnep ma kumningambun; tikjakningambun. Kun ak niņiy, Gor nup tep aņgjun.

⁵⁸ Pen mam ay tep yand gok. Gor nup ma kirginjun; chingiy nep mindenjun. Kumiy tikjakningambun aņgiy, gos sek mindiy, nup direp giyīņg nep mindenjun.

16

Opriyñ Gunap Dayrep Genimimb

¹ Gor biynimb nuk Jerusalem mindpay gok kuyip yiwani yomb apek; maniy di nan-giy ñiningambim minim ak, anjning gispiyn. Gor biynimb nuk miñmon yomb Galesiya sek, miñmon sikoy kun okok sek kuyip anjen, giyak rek nimb kunep ginimimb. ² Nimb mañgiysek maniy yerip yerip dipim ak niñiy, Sandey ñin gok gunap di nan-genimimb mey; mindpim ak amjakiy, maniy nen ma angrangenim.

³ Pen ñin kun ak, bi nimb key niñem tep gip gok anjiy, maniy kun ak minj sek tikñem, dand Jerusalem amningiy. ⁴ Pen yip amemb rek ayek, yand yip amningambun.

⁵ Masedoniya propens amning gispiyn rek, kun okok amiy, mindpim ak niningayn. ⁶ Nimb yip sikoy won bap mindenim rek ayip. Yombip ayip ñin biy nimb yip mindiy, amning yip dam kinjenamb ak yokem amningayn. ⁷ Nimbip am kirak niñiy amemb ak, yip tep ma gip. Biyomb chin ak yaw anjek, tapin mindiy amningayn.

⁸ Yand miñmon Yipiyses biy mindiy, Pendiynos ñin yomb ak apiy pandikek kisen niningayn. ⁹ Miñmon kun biy, biynimb yip yiruk niñbay gok kuñay mindpay ak pen, Gor woñg tep ak kuñay mindip.

¹⁰ Pen Timotiy mindpim ak apek, nup direp gem, ma piriknimuñ. Nuk yand Biyomb anup woñg gipiyn rek nep gip ak niñiy, ¹¹ ma kirginimimb. Mañgiysek nup direp gem mindiy,

kisen amning, dap kinjenamb ak yokem, mam ay gunap yip mindpiyn biy winingiy.

¹² Pen mam Apolas nup nembnemb giying apiyn; mam gunap Koriyn amjipay rek, yip amnin apiyn ak pen, nuk miñiy ma niningamb. Kisen nemb rek ayek niningamb.

Minim Day Gunap Sek Angak

¹³ Ninying mindenimimb. Gor nup gosimb ninmindiy, ma piriknimimb. Nup chingrep giy, ¹⁴ biynimb wasemb ayep ar ak gem amnimun.

¹⁵⁻¹⁶ Mam ay sikop. Nimb ninbim; Griyk kay Krays nup diyak gok, Stepanas biynimb kind nuk ak nind diyak. Diy mey, biynimb Gor ker gok kuyip wasemb ay, direp giying nep mindpay. Biynimb yand gok nimbip aspiyn; biynimb tep kun gok rek ninji, angningiy rek nep ginimimb.

¹⁷ Pen nimb ap yip ninnimimb rek ma ayek; Stepanas, Potiwnatas, Akaykas ap yip ninbay ak, yip tep yimb gip. ¹⁸ Gipay kun ak, chinup mangiysek tep gip rek, kuyip wasemb ayjun.

¹⁹ Pen biynimb Gor ker mindpay miñmon keykey Esiya propens biy, nimbip Koriyn kay, “Mindpim?” apay. Akiwiyla biynuk Priysiyla sek, Koriyn biynimb akniy mindpay gok sek apay, “Gor nimbip kond mindonimun apay.” Biynimb ap korip kuyip ber lotiw gipay gok kunep apay. ²⁰ Pen mam ay mangiysek, “Nimb mindpim?” apay. Chin Gor biynimb nuk gipun rek, nimb mangiysek penpen ñin piksanimimb.

²¹ Yand Pol, minim day won biy ñin mangiy yand ak key tikiy “Nimb mindpim?” aspiyn.

²² Biynimb Gor nup gosimb ma niñniñgiy gok yiwur yomb diniñgiy. Biyomb chin ak kasek winimun!

²³ Biyomb chin Jiysis, nimbip simb niñiy direp ginimun.

²⁴ Yand Jiysis Krays binuk mindpiyn ak, nimbip mañgiysek wasemb aypiyn.

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 21 Feb 2024 from source files dated 31 Aug 2023

1491c109-3ee2-5565-9b83-06c480168547